

কর্মপদ্ধতি







## কর্মপদ্ধতি

প্রকাশনায়

বিআইসিএস

৪৮/১-এ, পুরানা পল্টন, ঢাকা-১০০০

ওয়েবসাইট : [www.shibir.org.bd](http://www.shibir.org.bd)

প্রথম প্রকাশ : ১৯৭৭

দ্বিতীয় প্রকাশ : নভেম্বর-২০০১

তৃতীয় প্রকাশ : এপ্রিল-২০০৪

চতুর্থ প্রকাশ : জানুয়ারি-২০০৭

পঞ্চম প্রকাশ : মে-২০০৮

ষষ্ঠ প্রকাশ : মে-২০০৯

সপ্তম প্রকাশ : ফেব্রুয়ারি-২০১০

অষ্টম প্রকাশ : জানুয়ারি-২০১৭

নবম প্রকাশ : জুলাই-২০১৯

প্রচ্ছদ ও অলঙ্করণ

আণিক খন্দকার

মূল্য : ২০ টাকা মাত্র

## বিসমিল্লাহির রাহমানির রাহীম

### ভূমিকা

আল্লাহর এই জমিনে সকল প্রকার জুলুম ও নির্যাতনের মূলোচ্ছেদ করে আল-কুরআন ও আল-হাদিসের আলোকে ভ্রাতৃত্ব ও ন্যায়ের সৌধের ওপর এক আদর্শ ইসলামী সমাজ গড়ে তোলার মহান লক্ষ্যকে সামনে রেখেই প্রতিষ্ঠিত হয়েছে বাংলাদেশ ইসলামী ছাত্রশিবির। চমক লাগানো সাময়িক কোনো উদ্দেশ্য হাসিল এর লক্ষ্য নয়।

বাংলাদেশ ইসলামী ছাত্রশিবিরের লক্ষ্য তাই চিরন্তন, শাশ্বত। সমাজের প্রতিটি অন্যান্য, জাহেলিয়াত ও আল্লাহদ্রোহিতার বিরুদ্ধে রয়েছে এর বলিষ্ঠ ভূমিকা। বলাই বাহুল্য, আধুনিক জাহেলিয়াতের যুগে এর চলার পথ হবে সংগ্রামমুখর। এ কঠিন ও সংগ্রামী পথ স্বাভাবিকভাবেই দাবি করে বিজ্ঞানসম্মত ও যুক্তিভিত্তিক বাস্তব পদক্ষেপ। তাই ইসলামী ছাত্রশিবিরের কর্মসূচি রচিত হয়েছে এর উদ্দেশ্য, মর্যাদা, বৈশিষ্ট্য ও আন্দোলনের মেজাজকে সামনে রেখে। আর এই কর্মসূচিকে বাস্তবায়নের জন্য গ্রহণ করা হয়েছে এক সুনির্দিষ্ট কর্মপদ্ধতি।

কর্মপদ্ধতি বা কর্মকৌশল (Strategy) ছাড়া কোনো আন্দোলন সফলকাম হতে পারে না। একটা আন্দোলন বা সংগঠনের সফলতার জন্য প্রয়োজন এর কর্মশক্তি, জনশক্তি এবং জনসমর্থনের সুসামঞ্জস্যপূর্ণ ব্যবহার। ইসলামী আন্দোলনের প্রতিটি কর্মীর যোগ্যতা, কর্মদক্ষতা, চিন্তাশক্তি, আন্দোলনের পেছনের জনসমর্থন সবকিছু আল্লাহ প্রদত্ত আমানত। আর এসব উপাদানকে ফলপ্রসূ এবং কার্যকর খাতে কাজে লাগানোও এক বিরাট আমানত। বাতিলের পর্বতপ্রমাণ ঐশ্বর্য ও কুসংস্কারের উত্তাল তরঙ্গের সামনে মুষ্টিমেয় মর্দে মুমিনের

বিজয় আল্লাহ রাক্বুল আলামিনের খাস রহমতেই সম্ভব-একথা সত্য। কিন্তু সঠিক কর্মপদ্ধতি অবলম্বন না করে ইসলামী আন্দোলনের কাজ করলে তা যে আমানতের সুস্পষ্ট খেয়ানত এতেও কোনো সন্দেহ নেই। তাই একটি বৈজ্ঞানিক এবং বাস্তবসম্মত কর্মপদ্ধতি ইসলামী আন্দোলনের জন্য অপরিহার্য। ইসলামের সাথে অন্যান্য বাতিল মতাদর্শের পার্থক্য শুধুমাত্র দর্শনগত বা তাত্ত্বিক নয়; পদ্ধতিগত দিকেও রয়েছে এর বিরাট পার্থক্য। ন্যায় ও যুক্তিসঙ্গত পথেই বাতিলের অপসারণ ইসলামের কাম্য। এ ব্যাপারে বাতিলের সাথে আপসের কোনো প্রশ্নই ওঠে না। তাই ইসলামকে সমাজে প্রতিষ্ঠা করার পদ্ধতিও অন্যান্য আন্দোলনের কর্মপদ্ধতি থেকে ভিন্ন। এই চরম সত্যটা আমাদের ভুলে গেলে চলবে না। অন্যান্য আন্দোলনের কর্মপদ্ধতির মাধ্যমে আপাতত সাফল্যের প্রবণতা যেন আমাদের মন-মগজকে আচ্ছন্ন করতে না পারে। আমাদের অন্তরে একথা গেঁথে নিতে হবে যে, ইসলামী আন্দোলনের কর্মপদ্ধতির ভিত্তি এবং অন্যান্য আন্দোলনের ভিত্তি কখনো এক হতে পারে না। পর্যালোচনার মাধ্যমে কৌশলগত কিছু দিক হয়তো আমরা গ্রহণ করতে পারি কিন্তু সব সময় সজাগ থাকতে হবে যেন, এই গ্রহণের সময়ও ইসলামী আন্দোলনের মৌলিক ভিত্তি ও নীতিবোধের ওপর কোনোরূপ আঘাত না আসে। ইসলামী আন্দোলনের কর্মপদ্ধতি একমাত্র রাসূল (সা.)-এর অনুসৃত পদ্ধতি। যুগে যুগে ইসলামী রেনেসাঁসের ইতিহাসলব্ধ অভিজ্ঞতা এই কর্মপদ্ধতিকে করেছে সময়োপযোগী এবং বাস্তবমুখী। আর এই অভিজ্ঞতার পটভূমিতে সৃষ্টি হয়েছে পৃথিবীর বিভিন্ন দেশের ইসলামী আন্দোলনের সংগ্রামী ঐতিহ্য। ইসলামী আন্দোলনের কর্মীদের ত্যাগ-তিতিক্ষা ও শাহাদাতের পবিত্র রক্তের যোজ্ঞনায় সৃষ্টি হয়েছে নতুন ইতিহাস। ইসলামী ছাত্রশিবিরের বৈজ্ঞানিক কর্মপদ্ধতিও ইতিহাস এবং ঐতিহ্যের স্বাভাবিক ফল।

কর্মপদ্ধতির কতকগুলো কৌশলগত দিক রয়েছে। এই কর্মকৌশল পরিবেশ ও পরিস্থিতির প্রেক্ষিতে পরিবর্তনশীল। তাই এই কর্মকৌশল স্থায়ীভাবে উল্লেখ সম্ভব নয়, আর এটা অবাস্তবও। নির্দিষ্টভাবে কর্মপদ্ধতির মোটামুটি দিকগুলো পরিবেশিত হলো। ইতিহাস এবং ঐতিহ্যের আলোকে কর্মীদের মাধ্যমে এবং সর্বোপরি হেকমতের বাস্তব প্রয়োগের মাধ্যমে এইসব কৌশলগত দিকও রপ্ত করতে হবে।

সংগঠনের একজন আদর্শ কর্মী হতে হলে যেমন প্রয়োজন মজবুত ঈমান, খোদাভীতি, আদর্শের সুস্পষ্ট জ্ঞান, আন্তরিকতা, নিষ্ঠা, কর্মস্পৃহা ও চারিত্রিক

মাধুর্য তেমনি প্রয়োজন কর্মসূচি ও কর্মপদ্ধতির যথার্থ অনুধাবন। কর্মসূচি ও কর্মপদ্ধতিসংক্রান্ত অজ্ঞতা বা জ্ঞানের স্বল্পতা যাবতীয় প্রচেষ্টা নিষ্ফল করে দেয়। ইসলামী আন্দোলনের অংশ হিসেবে ইসলামী ছাত্রশিবিরেরও রয়েছে একটি সুনির্দিষ্ট বাস্তবমুখী কর্মসূচি এবং তা বাস্তবায়নের জন্য রয়েছে একটি বিজ্ঞানসম্মত কর্মপদ্ধতি। তাই এর সাথে সংশ্লিষ্ট প্রত্যেককে এই কর্মসূচি ও কর্মপদ্ধতি জানতে হবে, অনুধাবন করতে হবে। এর জন্য প্রয়োজন বারবার অধ্যয়নের। প্রয়োজন চিন্তা, গবেষণা ও অধ্যবসায়ের প্রয়োগ। কর্মপদ্ধতির সাথে সক্রিয় কাজের রয়েছে গভীর সম্পর্ক। শুধু তাত্ত্বিক আলোচনার মধ্য দিয়ে কর্মপদ্ধতির সবকিছু পরিষ্কার হওয়া সম্ভব নয়। সক্রিয় ও বাস্তব কাজের অভিজ্ঞতা কর্মপদ্ধতির প্রাণশক্তি। তাই আলোচনা-পর্যালোচনার সাথে সাথে তুলনামূলকভাবে পুরাতন ও দায়িত্বশীল কর্মীদের অভিজ্ঞতার আলোকে কর্মপদ্ধতিকে বুঝতে হবে, স্বচ্ছ ধারণা অর্জন করতে হবে। ইতিহাসলব্ধ জ্ঞান কর্মপদ্ধতিকে করে মার্জিত, সমন্বয়যোগী এবং বাস্তবমুখী। ইসলামী আন্দোলনের ইতিহাস ও ঐতিহ্য যুগে যুগে আন্দোলনের যে মেজাজের জন্য দিয়েছে তা কর্মীদের উপলব্ধি করতে হবে। তাই ইসলামী আন্দোলনের সংগ্রামী ইতিহাসের পটভূমিতে এর কর্মপদ্ধতি অধ্যয়ন ও বাস্তবায়ন করতে হবে। নিম্নে আমাদের পাঁচ দফা কর্মসূচির বিশ্লেষণ ও তা বাস্তবায়নের পদ্ধতি উল্লেখ করা হলো। যারা এ সংগঠনের সাথে সংশ্লিষ্ট থেকে সংগঠনের কর্মী হিসেবে নিজ দায়িত্ব আঞ্জাম দিতে চান তাদেরকে এটা বুঝতে হবে এবং বাস্তব জীবনে তা প্রয়োগ করতে হবে।

## বাংলাদেশ ইসলামী ছাত্রশিবিরের পাঁচ দফা কর্মসূচি ও তার বাস্তবায়ন

### প্রথম দফা কর্মসূচি : দাওয়াত

‘তরুণ ছাত্রসমাজের কাছে ইসলামের আহ্বান পৌঁছিয়ে তাদের মাঝে ইসলামী জ্ঞানার্জন এবং বাস্তবজীবনে ইসলামের পূর্ণ অনুশীলনের দায়িত্বানুভূতি জাগ্রত করা।’

এ দফায় তিনটি দিক রয়েছে—

**প্রথমত :** তরুণ ছাত্রসমাজের কাছে ইসলামের আহ্বান পৌঁছিয়ে দেওয়া অর্থাৎ ইসলামের ব্যাপক প্রচার।

**দ্বিতীয়ত :** ছাত্রদের মাঝে ইসলামী জ্ঞান অর্জনের দায়িত্বানুভূতি জাগ্রত করা।

**তৃতীয়ত :** ইসলামী অনুশাসন মেনে চলার জন্য ছাত্রদের মধ্যে দায়িত্বানুভূতি জাগ্রত করা।

এ তিনটি দিকের কাজ হলেই আমাদের বুঝতে হবে প্রথম দফার কাজ সঠিকভাবে হচ্ছে। সংক্ষেপে এ দফাকে ‘দাওয়াত’ বলা হয়। নিম্নে এ দফার করণীয় কাজগুলো উল্লেখ করা হলো :

- ব্যক্তিগত সাক্ষাৎকার ও সম্মীতি স্থাপন
- সাপ্তাহিক ও মাসিক সাধারণ সভা
- সিম্পোজিয়াম, সেমিনার
- চা-চক্র, বনভোজন ও শিক্ষাসফর
- নবাগত সংবর্ধনা ও কৃতি ছাত্র সংবর্ধনা
- বিভিন্ন বিষয়ে প্রতিযোগিতা
- পোস্টারিং, দেয়াল লিখন, পরিচিতি ও বিভিন্ন সময়ে প্রকাশিত সাময়িকী বিতরণ
- ক্যাসেট, সিডি, ভিসিডি প্রভৃতি বিতরণ।

### ব্যক্তিগত সাক্ষাৎকার ও সম্মীতি স্থাপন

দাওয়াতি কাজের সর্বোত্তম পন্থা হলো ব্যক্তিগত সাক্ষাৎকার। শিক্ষাপ্রতিষ্ঠান, ছাত্রাবাস, গ্রাম ও মহল্লা থেকে কয়েকজনকে বেছে নিয়ে এ পন্থায় কাজ করতে হবে। এরই নাম টার্গেট নির্ধারণ। ছাত্র বেছে নেয়ার সময় নিম্নোক্ত গুণাবলির প্রতি নজর রাখা উচিত :

- (১) মেধাবী
- (২) বুদ্ধিমান ও কর্মঠ
- (৩) চরিত্রবান

(৪) নেতৃত্বের গুণাবলিসম্পন্ন

(৫) সমাজে বা শিক্ষাপ্রতিষ্ঠানে প্রভাবশালী।

ব্যক্তিগত সাক্ষাৎকারের জন্য নিম্নোক্ত পন্থা অবলম্বন করা প্রয়োজন—

### ক. পরিকল্পনা

টার্গেটকৃত ছাত্রকে অগ্রসর করে নেওয়ার জন্য একটি বাস্তব পরিকল্পনা থাকা চাই। তা প্রয়োজন অনুযায়ী অল্প অথবা দীর্ঘ সময়ের জন্য হতে পারে। পরিকল্পিত কাজ করলেই সাক্ষাৎকারী একজন ছাত্রের চিন্তার পরিশুদ্ধির জন্য যথার্থ চিন্তা-ভাবনা করার সুযোগ পায়। অনেক ছাত্রকে একসাথে টার্গেটের আওতায় না এনে সুযোগ এবং সামর্থ্য অনুযায়ী কমসংখ্যক ছাত্রের ওপর অত্যন্ত ধৈর্য ও আন্তরিকতার সাথে নিয়মিত কাজ চালিয়ে যেতে হবে।

### খ. সম্প্রীতি স্থাপন

ব্যক্তিগত সাক্ষাৎকারের মাধ্যমে যার কাছে দাওয়াত পৌঁছাতে হবে তার সাথে পূর্বেই সুসম্পর্ক স্থাপন করতে হবে। এমন এক আন্তরিক পরিবেশ সৃষ্টি করতে হবে যেন সে সাক্ষাৎকারীকে তার শুভাকাঙ্ক্ষী হিসেবে বিশ্বাস করতে পারে। এক্ষেত্রে সম্পর্ক বৃদ্ধির জন্য ওই মাধ্যমে মূলত একজন সাধারণ ছাত্রকে বন্ধু পর্যায়ে উপনীত করা হয়। সম্পর্ক বৃদ্ধির জন্য একসঙ্গে ভ্রমণ, একত্রে নাস্তা করা, খাওয়া, নিজ বাসায় নিয়ে আসা, তার বাসায় যাওয়া, উপহার দেওয়া ইত্যাদি উপায় অবলম্বন করা।

### গ. ক্রমধারা অবলম্বন

প্রথম সাক্ষাতেই মূল দাওয়াত পেশ না করে ক্রমান্বয়ে এ কাজ সুসম্পন্ন করতে হবে। প্রথমে বন্ধুত্ব সৃষ্টির মাধ্যমে এমন এক পর্যায়ে আনতে হবে যাতে পারস্পরিক আস্থা ও বিশ্বাস স্থাপিত হয়। একে অন্যের কল্যাণকামী হয়।

**প্রথমত :** টার্গেটকৃত ছাত্রের মন-মগজে প্রতিষ্ঠিত ইসলাম ও ইসলামী আন্দোলন সম্পর্কে যাবতীয় ভুল ধারণার অসারতা বুদ্ধিমত্তার সাথে তুলে ধরতে হবে।

**দ্বিতীয়ত :** আখিরাতে তথা পরকাল সম্পর্কে সুস্পষ্ট ধারণা দিতে হবে এবং যাবতীয় সমস্যার সমাধানে ইসলামের সুমহান আদর্শের কার্যকারিতা তুলে ধরতে হবে। ইসলামসংক্রান্ত তার যাবতীয় ভুল ধারণা দূর করে এর প্রতি আকর্ষণ সৃষ্টি করতে হবে। ইসলামের অনুশাসনগুলোর (ইবাদত) প্রতি পরোক্ষ এবং কোনো কোনো সময় প্রত্যক্ষভাবে সজাগ করতে হবে।

**তৃতীয়ত :** তাকে ইসলামী আন্দোলনের ও সাংগঠনিক জীবনের প্রয়োজনীয়তা উপলব্ধি করাতে হবে। রাসূলুল্লাহ (সা.)-এর জীবন, সাহাবায়ে কেলামদের



জীবনের ঘটনাবলি, যুগে যুগে ইসলামী আন্দোলন সৃষ্টিকারী মহৎ ব্যক্তিদের জীবনের মাধ্যমে তাকে আন্দোলন ও সংগঠনের প্রয়োজনীয়তা বোঝাতে হবে। এ পর্যন্ত কৃতকার্য হলে পরবর্তী পর্যায়ে তাকে প্রত্যক্ষভাবে সংগঠনে অংশগ্রহণ করার আহ্বান জানাতে হবে। দাওয়াতি কাজের এটাই স্বাভাবিক পন্থা। এ প্রক্রিয়াই মূলত একজন বন্ধুকে সমর্থক পর্যায়ে উপনীত করা হয়।

### ঘ. যোগাযোগকারীর বৈশিষ্ট্য

যোগাযোগকারীকে নিম্নলিখিত বৈশিষ্ট্যের অধিকারী হতে হবে :

কম কথা বলা। অত্যধিক ধৈর্যের পরিচয় দেওয়া। বেশি কথার পরিবর্তে চারিত্রিক মাধুর্য দিয়ে প্রভাব সৃষ্টি করা। ইসলাম সম্পর্কে সঠিক ও সুস্পষ্ট ধারণা রাখা। কোনো প্রশ্নের উত্তর দিতে না পারলে ব্যক্তিত্ব অক্ষুণ্ণ রেখে সময় নেওয়া। গৌজামিলের আশ্রয় না নেওয়া। যার সাথে সাক্ষাৎ করা হচ্ছে তার মন-মানসিকতার দিকে লক্ষ রাখা। যোগাযোগকৃত ছাত্রের রোগ দূর করার জন্য একজন অভিজ্ঞ চিকিৎসকের ভূমিকা পালন করা। তার দুর্বলতার সমালোচনা না করে সং গুণাবলি বিকাশে সহযোগিতা করা। ব্যবহারে অমায়িক হওয়া। তার সুখ-দুঃখের অংশীদার হওয়া। মনকে অহেতুক ধারণা থেকে মুক্ত রাখা।

### ঙ. ক্রমান্বয়ে কর্মী পর্যায়ে নিয়ে আসা

একজন ছাত্রকে শুধু আদর্শ, আন্দোলন ও সংগঠনের দাওয়াত দিলেই চলবে না, তাকে ক্রমান্বয়ে কর্মী পর্যায়ে নিয়ে আসতে হবে। আমাদের সংগঠনের লক্ষ্যে পৌঁছার জন্য চাই কাজ, এজন্য প্রয়োজন কর্মীর। একজন সমর্থককে কর্মীরূপে গড়তে হলে ব্যক্তিগত যোগাযোগ ছাড়াও নিম্নোক্ত উপায়গুলো কাজে লাগাতে হবে :

১. সংগঠনের বিভিন্ন অনুষ্ঠানের প্রতি প্রত্যক্ষ বা পরোক্ষভাবে আগ্রহী করতে হবে।
২. সাধারণ সভা, চা-চক্র ও বনভোজনে शामिल করাতে হবে।
৩. ছাত্রদের জ্ঞান, বুদ্ধি, আন্তরিকতা, মানসিকতা ও ঈমানের দৃঢ়তা লক্ষ্য করে পরিকল্পিতভাবে বই পড়াতে হবে।
৪. বিভিন্ন ইবাদতের প্রতি তার দৃষ্টি আকর্ষণ করাতে হবে।
৫. সময় সময় মন-মানসিকতা বুঝে তাকে ছোটো-খাটো কাজ দিতে হবে।
৬. ব্যক্তিগত রিপোর্ট সংরক্ষণে অভ্যস্ত করাতে হবে।

এছাড়াও মসজিদে, ক্যান্টিনে, শিক্ষাপ্রতিষ্ঠানে আলোচনা, সাহিত্যসভা, বিতর্কসভা ইত্যাদি সমাবেশে ছাত্রদের মধ্যে দাওয়াতদানে সচেষ্ট থাকতে হবে। অর্থাৎ দাওয়াত কখনো সরাসরি হবে, কখনো হবে পরোক্ষভাবে।

মুসলিম একটি মিশনারি জাতি। আব্বাহ রাব্বুল আলামিন মুসলিম জাতিকে সৃষ্টি করেছেন তাঁর দ্বীনের পথে মানুষকে ডাকার জন্য। মুসলমানদের জীবনের এটাই একমাত্র মিশন। যতদিন মুসলমানরা দুনিয়ার বুকে এই দায়িত্ব পালন করেছিল

ততদিন তারাই ছিল দুনিয়ার বুকে নেতা। আর যখনই তারা এই দায়িত্ব পালনে গাফেল হলো তখনই তাদের ওপর নেমে এলো লাঞ্ছনা। তাই আল্লাহর জমিনে তাঁর দীন প্রতিষ্ঠার দায়িত্বকেই আমাদের জীবনের মিশন হিসেবে গ্রহণ করতে হবে।

### সাপ্তাহিক সাধারণ সভা

নিয়মিত কাজের মধ্যে সাপ্তাহিক সাধারণ সভা অত্যন্ত গুরুত্বপূর্ণ। প্রতি সপ্তাহে নির্দিষ্ট সময়ে আল্লাহর দ্বীনের দাওয়াত পৌঁছে দেওয়ার উদ্দেশ্যে এক জায়গায় জমায়েত হওয়ার মাধ্যমে ইসলামী জ্ঞানার্জন ছাড়াও পারস্পরিক ভ্রাতৃত্ববোধ জাগ্রত হয়। সপ্তাহে প্রতিটি কর্মী যতজন ছাত্রের সাথে ব্যক্তিগত সাক্ষাৎকারের মাধ্যমে সংগঠনের দাওয়াত পৌঁছায় তাদেরকে এ সভায় দাওয়াত দিতে হয়। এতে করে যোগাযোগকৃত ছাত্রদের মধ্যে সাংগঠনিক ও সমষ্টিগত জীবনের অনুভূতি জাগ্রত হয়। এ সভাগুলো হচ্ছে প্রচারধর্মী। এগুলো সমষ্টিগতভাবে দাওয়াতি কাজ করার ফোরাম হিসেবে ব্যবহৃত হয়। এ ছাড়াও সভায় বক্তৃতা ও কুরআনের অংশবিশেষ অর্থসহ পেশ করার মাধ্যমে কর্মীদের যোগ্যতা বৃদ্ধি পায়। সাপ্তাহিক সাধারণ সভার কর্মসূচি নিম্নরূপ হওয়া উচিত :

- অর্থসহ কুরআন তিলাওয়াত
- বিষয়ভিত্তিক সংক্ষিপ্ত আলোচনা
- সভাপতির বক্তব্য

### মাসিক সাধারণ সভা

প্রতিমাসে একটি করে মাসিক সাধারণ সভার আয়োজন করাও আমাদের নিয়মিত দাওয়াতি কার্যক্রমের অন্তর্ভুক্ত। সংগঠনের প্রাক্কন কোনো কর্মী, অভিজ্ঞ যেকোনো কর্মী বা দায়িত্বশীল ব্যক্তি, একটি নির্দিষ্ট বিষয়ের ওপর এতে আলোচনা পেশ করবেন। এর কর্মসূচি নিম্নরূপে হবে :

- অর্থসহ কুরআন তিলাওয়াত
- নির্দিষ্ট বিষয়ের ওপর বক্তৃতা
- সংগঠনের পরিচয় পেশ
- সভাপতির বক্তব্য
- পরিচিতি বিতরণ

এ সভায় বেশি সংখ্যক নতুন ছাত্র উপস্থিত করার চেষ্টা করা প্রত্যেক কর্মীর দায়িত্ব।

## সিম্পোজিয়াম

উর্ধ্বতন সংগঠনের অনুমতিক্রমে কোনো উপলক্ষকে সামনে রেখে সিম্পোজিয়ামের আয়োজন করা যেতে পারে। কোনো হলে বা অডিটোরিয়ামে যেকোনো একটি গুরুত্বপূর্ণ বিষয়ে একজন বিশিষ্ট বক্তার দ্বারা বক্তৃতার আয়োজন করা যেতে পারে। সিম্পোজিয়ামকে আকর্ষণীয় ও সুশৃঙ্খল ব্যবস্থাপনার মাধ্যমে সম্পন্ন করতে হবে। এতে ছাত্র ছাড়াও উৎসাহী যেকোনো ব্যক্তিই থাকতে পারেন। সিম্পোজিয়ামের কর্মসূচি সাধারণত নিম্নরূপ :

- অর্থসহ কুরআন তিলাওয়াত
- নির্ধারিত বিষয়ের ওপর বক্তৃতা
- প্রশ্নোত্তর
- সংগঠনের পরিচয় পেশ
- সভাপতির ভাষণ

## সেমিনার

কেন্দ্রীয় সংগঠনের অনুমতিক্রমে বছরে একবার অথবা দুবার উপযুক্ত পরিবেশ ও সময়ে শিক্ষাব্যবস্থা, রাসূলুল্লাহ (সা.)-এর জীবন, বিভিন্ন সমস্যার ইসলামী সমাধান ইত্যাদি বিষয়ের ওপর সেমিনার করা যেতে পারে। একটি বিষয়ের বিভিন্ন দিকের ওপর কয়েকজন বক্তা এতে বক্তৃতা করবেন। এজন্য চিন্তাশীল ও সুযোগ্য বক্তা প্রয়োজন। ইসলামী প্রজ্ঞাসম্পন্ন কোনো ব্যক্তিকে সভাপতি মনোনীত করতে হবে। সেমিনারের কর্মসূচি সাধারণত নিম্নরূপ :

- অর্থসহ কুরআন তিলাওয়াত
- উদ্বোধনী বক্তব্য
- প্রবন্ধ উপস্থাপন
- প্রবন্ধের ওপর আলোচনা
- সভাপতির বক্তব্য

উল্লেখ্য যে, সেমিনারে এক বা একাধিক অধিবেশন হতে পারে।

## চা-চক্র

দাওয়াতি কাজের জন্য এটা একটা আকর্ষণীয় প্রোগ্রাম। অনুষ্ঠানের বৈচিত্র্য ও আনন্দঘন পরিবেশে ছাত্রসমাজের কাছে আন্দোলনের দাওয়াত পৌঁছে দেওয়া সম্ভব হয়। টার্গেটকৃত ছাত্রদের এতে আমন্ত্রণ জানানো হয়। প্রত্যেক কর্মীকে চা-চক্রের খরচ নির্বাহের জন্য নির্ধারিত হারে আর্থিক সহযোগিতা দিতে হয়। আমন্ত্রিতদের কেউ অগ্রহ করে আর্থিক সহযোগিতা দিতে চাইলে নেওয়া যেতে

পারে। চা-চক্রের জন্য নিরিবিলা কোনো জায়গা বেছে নেওয়া প্রয়োজন। স্মরণ রাখতে হবে, নতুন ছাত্রদের আকৃষ্ট করার উদ্দেশ্যেই চা-চক্রের আয়োজন করা হয়। সংগঠনের উর্ধ্বতন দায়িত্বশীল ব্যক্তির আগমনকে উপলক্ষ করেও চা-চক্রের আয়োজন করা যেতে পারে। অন্যান্য ছাত্রসংগঠনের নেতৃবৃন্দ এবং ছাত্র সংসদ কর্মকর্তাদেরও এরূপ চা-চক্রে দাওয়াত দেওয়া যেতে পারে। খেয়াল রাখতে হবে, যেন পরিবেশ গুরু-গম্ভীর হয়ে না পড়ে অথবা মাত্রাতিরিক্ত হালকা না হয়। চা-চক্রের কর্মসূচি নিম্নরূপ হওয়া বাঞ্ছনীয় :

- কুরআন তিলাওয়াত
- পারস্পরিক পরিচয়
- কবিতা আবৃত্তি, হামদ, নাত, শিক্ষণীয় কোনো ঘটনার উল্লেখ ইত্যাদি
- প্রশ্নোত্তর
- সভাপতির বক্তব্য
- আপ্যায়ন
- সমাপ্তি ঘোষণা

### বনভোজন/শিক্ষাসফর

ছাত্রদের পাঠ্যজীবনের এক্ষেয়েমি দূর করার জন্য এ ধরনের কর্মসূচির প্রয়োজনীয়তা রয়েছে। বনভোজন/শিক্ষাসফরে আনন্দ লাভের সাথে সাথে ইসলামী পরিবেশও উপভোগ করা যায়।

বনভোজন/শিক্ষাসফরের জন্য শহরের উপকণ্ঠে অথবা গ্রামের কোনো সুন্দর প্রাকৃতিক পরিবেশে অথবা ঐতিহাসিক কোনো স্থানে যাওয়ার প্রোগ্রাম নিতে হবে। পূর্বাঙ্কেই বনভোজন/শিক্ষাসফরের তারিখ, বিভিন্ন কাজের দায়িত্ব বন্টন, ডেলিগেট ফি-র পরিমাণ, একত্রিত হওয়ার সময় ও স্থান, রওয়ানা হওয়ার সময় ইত্যাদি নির্ধারণ করে নিতে হবে। নির্দিষ্ট জায়গায় পৌঁছে কর্মসূচি জানিয়ে দিতে হবে। কর্মসূচির মধ্যে বক্তৃতা প্রতিযোগিতা, রশি টানাটানি, সাঁতার কাটা, গ্রুপ ভ্রমণ, বিভিন্ন শিক্ষামূলক আসর ইত্যাদি থাকবে। মনে রাখতে হবে উদ্যোক্তাদের যোগ্যতার মাধ্যমে পরিবেশকে আনন্দময় সুশৃঙ্খল এবং শিক্ষামূলক করে তোলার ওপরেই প্রোগ্রামের সাফল্য নির্ভর করে।

প্রতিষ্ঠানের নবাগত ছাত্রদের নিয়েও এ ধরনের আয়োজন করা যেতে পারে।

### নবাগত ও কৃতি ছাত্র সংবর্ধনা

প্রতিষ্ঠানে নবাগত ছাত্রদের সংবর্ধনা প্রদান এবং বিভিন্ন পরীক্ষায় জিপিএ-৫ প্রাপ্তসহ কৃতি শিক্ষার্থীদের সংবর্ধনার আয়োজন করা প্রয়োজন। সংবর্ধনার কর্মসূচি নিম্নরূপ :

- অর্থসহ কুরআন তিলাওয়াত
- হামদ/নাত/দেশের গান
- কৃতি শিক্ষার্থীর বক্তব্য
- শ্রেষ্ঠ প্রতিষ্ঠান প্রধানের বক্তব্য
- বিশেষ অতিথির বক্তব্য
- প্রধান অতিথির বক্তব্য
- ফ্রেস্ট বা পুরস্কার বিতরণ
- সভাপতির ধন্যবাদ জ্ঞাপন

### বিভিন্ন বিষয়ে প্রতিযোগিতা

রাসূল (সা.)-এর সিরাত গ্রন্থ, সাহাবাদের জীবনী এবং বিষয়ভিত্তিক বই নির্ধারণ করে গ্রন্থভিত্তিক সিরাত পাঠ ও বইপাঠ প্রতিযোগিতার আয়োজন করা প্রয়োজন। এ ছাড়াও আয়াত, হাদিস মুখস্থকরণ প্রতিযোগিতা, বিভিন্ন দিবসে বিভিন্ন বিষয়ের ওপর রচনা ও বক্তৃতা প্রতিযোগিতা, বিতর্কসভা এবং সাধারণ জ্ঞানের আসরসহ ছাত্রদের আদর্শিক জ্ঞান, সাহিত্য ও সৃজনশীল প্রতিভার বিকাশের জন্য আকর্ষণীয় বিষয়বস্তুর ওপর আকর্ষণীয় প্রতিযোগিতা রাখতে হবে। প্রতিযোগিতায় পুরস্কারের ব্যবস্থা থাকাটা উত্তম। প্রতিযোগিতার নিয়ম-কানুন পূর্বেই জানিয়ে দিতে হবে।

বিতর্ক প্রতিযোগিতায় ব্যক্তিগত আক্রমণ, মিথ্যার আশ্রয় গ্রহণ ও যেনতেন প্রকারে প্রতিপক্ষকে পরাজিত করার মনোভাব পরিত্যাজ্য এবং প্রতিপক্ষের উন্নত যুক্তির নিকট নিজের যুক্তি সমর্পণের মানসিকতা থাকতে হবে।

পোস্টারিং, দেয়াল লিখন, পরিচিতি ও বিভিন্ন সময়ে প্রকাশিত সাময়িকী বিতরণ বিভিন্ন উপলক্ষকে কেন্দ্র করে শিবিরের বৈশিষ্ট্য, কর্মসূচি ও দাওয়াতের ওপর পোস্টারিং ও দেয়াল লিখন হতে পারে। এসব দাওয়াতি পোস্টারিং ও দেয়াল লিখন সুন্দর ও আকর্ষণীয় করে লেখা প্রয়োজন। এ ছাড়া ব্যানারও টানানো যেতে পারে।

ভর্তি ও পরীক্ষার সময় নবীনদের উদ্দেশে অভিনন্দনপত্র এবং পরিচিতি প্রভৃতি ছাত্রদের নিকট বিতরণ করা প্রয়োজন। মাঝে মাঝে গ্রুপে সমষ্টিগত দাওয়াতি কাজ করার সময় পরিচিতি বিতরণ অভিযান চালানো যেতে পারে। শুভাকাঙ্ক্ষী শিক্ষক ও বুদ্ধিজীবী মহলেও পরিচিতি পৌঁছানো দরকার। বিভিন্ন পরীক্ষায় উত্তীর্ণ কৃতি শিক্ষার্থীদের অভিনন্দন জানিয়ে শুভেচ্ছাপত্র প্রকাশ ও পৌঁছানো প্রয়োজন।

সংগঠন থেকে বিভিন্ন সময়ে সাময়িকী স্মারক, বুকলেট ও পত্রিকা প্রকাশ এবং সূষ্ঠা বিতরণের মাধ্যমেও আমাদের দাওয়াত ছাত্রদের কাছে পৌঁছানো যায়। তবে এ ধরনের কিছু প্রকাশ করতে হলে কেন্দ্রীয় সংগঠনের অনুমোদনের প্রয়োজন। এ ছাড়া দাওয়াতি কাজ সম্প্রসারণের লক্ষ্যে তথ্যপ্রযুক্তির যথাযথ ব্যবহার নিশ্চিত করা দরকার।

### ক্যাসেট, সিডি, ভিসিডি প্রভৃতি বিতরণ

সংগঠন কর্তৃক প্রকাশিত ও অনুমোদিত ক্যাসেট ও সিডি, ভিসিডি প্রভৃতি বিতরণ করা প্রয়োজন।

### এছাড়াও দাওয়াতি কর্মসূচিসমূহ

#### গ্রুপ দাওয়াতি কাজ

উপশাখাসমূহে গ্রুপ দাওয়াতি কাজ পরিচালিত হবে। এসব দাওয়াতি গ্রুপে কমপক্ষে এমন একজন থাকবেন যিনি কুরআন হাদিসের আলোকে ছাত্রদের নিকট গ্রহণযোগ্য উপায়ে সংগঠনের আহ্বান পৌঁছাতে সক্ষম হবেন।

#### দাওয়াতি গ্রুপ প্রেরণ

কাজ সৃষ্টির উদ্দেশ্যে অপেক্ষাকৃত দুর্বল এলাকায় বিভিন্ন শাখা থেকে সুবিধাজনক সময়ে এক বা একাধিক দাওয়াতি গ্রুপ প্রেরিত হবে। যে এলাকায় গ্রুপ প্রেরণ করা হবে পূর্বেই তাদের সাথে যোগাযোগ করে প্রয়োজনীয় প্রোগ্রামের আয়োজন করা হবে।

#### দাওয়াতি সপ্তাহ, দশক ও পক্ষ

বছরের সুবিধাজনক সময়ে কেন্দ্র থেকে এই সপ্তাহ, দশক বা পক্ষ ঘোষিত হয়। সাধারণ ও স্কুল দাওয়াতি সপ্তাহ হিসেবে পৃথক পৃথক সপ্তাহ বা পক্ষ ঘোষণা হয়ে থাকে। একযোগে সকল শাখা পূর্বপরিকল্পিত উপায়ে এই সপ্তাহ বা পক্ষ পালন করবে। কোনো শাখা নির্দিষ্ট সময়ে সপ্তাহ পালনে অপারগ হলে কেন্দ্র থেকে অনুমতি নিয়ে নিজেদের সুবিধাজনক সময়ে এ কর্মসূচি পালন করতে হবে। এ সপ্তাহে এলাকার সকল ছাত্রের কাছে দাওয়াত পৌঁছানোর পরিকল্পনা নিতে হবে। দাওয়াতি সপ্তাহ উপলক্ষে শাখাসমূহ প্রয়োজনীয় দাওয়াতি উপকরণ কেন্দ্র থেকে সংগ্রহ করবে।

## মুহররমা, আত্মীয় ও প্রতিবেশীদের মাঝে দাওয়াত কাজ

ইসলামী আন্দোলনের কাজকে মজবুত করার লক্ষ্যে কর্মী ভাইয়েরা তাদের মা-বোন ও অন্যান্য মোহররমা অর্থাৎ যাদের সাথে বিবাহ হারাম এমন লোকজন এবং আত্মীয়-প্রতিবেশীদের মাঝে পরিকল্পিত উপায়ে দাওয়াতি কাজ করবেন। মুহররমাদের মাঝে কাজের রিপোর্ট আলাদাভাবে প্রদান করতে হবে।

## মসজিদভিত্তিক দাওয়াতি কাজ

এলাকার মসজিদকে কেন্দ্র করে শাখা বা উপশাখাসমূহ দাওয়াতি কাজ করবে। পাঠাগার তৈরি, দারুল কুরআন, হাদিস পাঠ, সহিহ কুরআন তিলাওয়াত ও নামাজ শিক্ষার আসর, বিভিন্ন দিবস পালন ইত্যাদি কর্মসূচির মাধ্যমে মসজিদভিত্তিক দাওয়াতি কাজকে ফলপ্রসূ করা যেতে পারে।

## অন্যান্য ধর্মাবলম্বীদের মাঝে দাওয়াতি কাজ

ইসলাম সাম্য ও ন্যায়ের সৌখের ওপর প্রতিষ্ঠিত। মানুষের মৌলিক অধিকার নিশ্চিত করার বিষয়ে ইসলাম প্রতিজ্ঞাবদ্ধ। তাই ইসলামের পরিচিতি ও এর সুমহান সৌন্দর্যকে অমুসলিম ছাত্রদের মাঝে তুলে ধরার জন্য যথাযথ পদক্ষেপ গ্রহণ করা প্রয়োজন।

এছাড়া সামার ক্যাম্প, স্প্রিং ক্যাম্পসহ মৌসুম উপযোগী আকর্ষণীয় প্রোগ্রাম হাতে নেওয়া যেতে পারে। যেকোনো পরিস্থিতিতেই শিক্ষাপ্রতিষ্ঠান কর্তৃক আয়োজিত বিভিন্ন শিক্ষামূলক অনুষ্ঠানে কর্মীদের যোগ দেওয়া অত্যন্ত প্রয়োজন। এতে করে উক্ত কর্মীর পরিচিতি বৃদ্ধি পাবে এবং সংগঠন সম্পর্কে সাধারণ ছাত্রদের উৎসুক্য বৃদ্ধি পাবে। স্মরণ রাখতে হবে যে, জ্ঞান ও বুদ্ধির জগতে আমাদেরকে শীর্ষস্থানীয় হতে হবে। এজন্য বিভিন্ন সাংস্কৃতিক প্রতিষ্ঠান কর্তৃক আয়োজিত রচনা প্রতিযোগিতা ও আলোচনা সভাসহ অন্যান্য প্রতিযোগিতায় অংশগ্রহণ করতে হবে।

## দ্বিতীয় দফা কর্মসূচি : সংগঠন

‘যেসব ছাত্র ইসলামী জীবনবিধান প্রতিষ্ঠার সংগ্রামে অংশ নিতে প্রস্তুত তাদেরকে সংগঠনের অধীনে সংঘবদ্ধ করা।’

সংক্ষেপে এ দফাকে আমরা ‘সংগঠন’ বলে থাকি। যেকোনো আন্দোলনেই সংগঠনের প্রয়োজন। সংগঠন বা সংঘবদ্ধ প্রচেষ্টা ছাড়া কোনো আন্দোলনই সফল হতে পারে না। বিশেষ করে সংঘবদ্ধ জীবন ছাড়া বিচ্ছিন্ন হয়ে সত্যিকারের মুসলমান থাকাটাই সম্ভব নয়। আল্লাহ তায়ালা নির্দেশ দিয়েছেন,

‘তোমরা সংঘবদ্ধভাবে আল্লাহর রজ্জুকে ধারণ করো এবং পরস্পর বিচ্ছিন্ন হয়ো না।’ (সূরা আলে ইমরান : ১০৩)

রাসূলে করিম (সা.) বলেছেন,

‘যে ব্যক্তি জামায়াত থেকে বের হলো সে ইসলাম থেকে দূরে সরে গেল।’ (আবু দাউদ : ৪১৩১)

ইসলামী আন্দোলনের গোড়া থেকেই আমরা সংগঠনের অস্তিত্ব দেখতে পাই। আজকের এ পক্ষিল পরিবেশে বাতিলের সর্বগ্রাসী ও চতুর্মুখী হামলার মোকাবেলায় এর প্রয়োজনীয়তা আরও বেশি বৃদ্ধি পেয়েছে। বস্তুত সংগঠন ছাড়া ইসলাম হতে পারে না। হজরত ওমর ফারুক (রা)-এর উদ্ধৃতি এখানে প্রণিধানযোগ্য। তিনি বলেছেন ‘লা ইসলামা ইন্না বিল জামায়াত।’ অর্থাৎ সংগঠন ছাড়া ইসলাম নেই। ইসলামের দাওয়াত পেশ করার পর যেসব ছাত্র আমাদের সাথে এর প্রতিষ্ঠার সংগ্রামে অংশ নিতে প্রস্তুত হয়, তাদেরকে আমাদের সংগঠনের অন্তর্ভুক্ত করে নিতে হবে। অন্তর্ভুক্তির পূর্বে ইসলামী আন্দোলনে সংগঠন হিসেবে শিবিরকে অবশ্যই বুঝতে হবে। অর্থাৎ সংগঠনের উদ্দেশ্য, কর্মসূচি কর্মপদ্ধতি ও সংবিধান সম্পর্কে তার প্রাথমিক জ্ঞান থাকতে হবে।

আমাদের সংগঠনের সদস্যপদ পার্থিব কোনো সম্পদের বিনিময়ে লাভ করা যায় না। এজন্য প্রয়োজন সংগঠনকে জানা, বোঝা এবং ঐকান্তিকতার সাথে অংশগ্রহণ করা।

তাই আমাদের সংগঠনের কাঠামো সম্পর্কে যেকোনো ছাত্রেরই ধারণা থাকা দরকার। শিবিরের সংবিধান অনুযায়ী এতে ‘সদস্য’ ও ‘সাথী’ এই দুই স্তরের কর্মী রয়েছে। তবে সাথী হওয়ার পূর্বে একজন ছাত্রকে আরও দুটি পর্যায় অতিক্রম করে আসতে হয়, তা হলো সমর্থক এবং কর্মী।



## কর্মী

যে সমর্থক সক্রিয়ভাবে দাওয়াতি কাজ করেন, কর্মীসভায় নিয়মিতভাবে যোগদান করেন, বায়তুলমালে এয়ানত দেন এবং ব্যক্তিগত রিপোর্ট রাখেন তাকে আমরা কর্মী বলে থাকি। একজন কর্মী সাধারণত নিম্নলিখিত কাজগুলি করবেন :

১. কুরআন ও হাদিস নিয়মিত বুঝে পড়ার চেষ্টা করবেন।
২. নিয়মিত ইসলামী সাহিত্য পড়বেন।
৩. ইসলামের প্রাথমিক দাবিসমূহ মেনে চলার চেষ্টা করবেন।
৪. বায়তুলমালে নিয়মিত এয়ানত দেবেন।
৫. নিয়মিত ব্যক্তিগত রিপোর্ট রাখবেন ও দেখাবেন।
৬. কর্মীসভা, সাধারণ সভা প্রভৃতি অনুষ্ঠানসমূহে যোগদান করবেন।
৭. সংগঠন কর্তৃক অর্পিত দায়িত্ব যথাযথভাবে পালন করবেন।
৮. অপরের কাছে সংগঠনের দাওয়াত পৌঁছে দেওয়ার চেষ্টা করবেন।

## সাথী

একজন কর্মীকে সংবিধানের ৯ নং ধারায় বর্ণিত শর্তাবলি পূরণ করে ‘সাথী’ হতে হয়। শর্তাবলি হচ্ছে—

১. সংগঠনের লক্ষ্য-উদ্দেশ্যের সাথে ঐকমত্য পোষণ করা।
২. সংগঠনের কর্মসূচি ও কর্মপদ্ধতির সাথে সচেতনভাবে একমত হওয়া।
৩. ইসলামের প্রাথমিক দায়িত্বসমূহ পালন করা।
৪. সংগঠনের সামগ্রিক তৎপরতায় পূর্ণভাবে সহায়তা করার প্রতিশ্রুতি দেওয়া।

‘সাথী’রা হচ্ছেন সংগঠনের একটি পরিপূরক শক্তি। ওপরে বর্ণিত দায়িত্বসমূহ নিষ্ঠার সাথে সুচারুরূপে পালন করে সংগঠনের প্রথম সারিতে (সদস্য পর্যায়ে) পৌঁছা একজন সাথীর নৈতিক দায়িত্ব। তবে সাথী হতে হলে ‘সাথী’ হওয়ার জন্য আবেদন করতে হয় এবং তা কেন্দ্রীয় সভাপতি অথবা তার নিযুক্ত প্রতিনিধির নিকট পাঠাতে হয়। কেন্দ্রীয় সভাপতি বা তার প্রতিনিধি উক্ত কর্মী ‘সাথী হওয়ার উপযুক্ত বিবেচনা’ করলে তখন তাকে সাথী করে নেবেন।

## সদস্য

যখন কোনো শিক্ষার্থী আমাদের এ সংগঠনের মাধ্যমে আল্লাহর কাছে সম্পূর্ণরূপে আত্মসমর্পণ করেন, যখন তিনি তার গোটা সত্তাকে সংগঠনের সাথে মিশিয়ে

দেন অর্থাৎ সংবিধানের ৪ নং ধারায় বর্ণিত শর্তসমূহ যথাযথভাবে পূরণ করেন তখন তাকে 'সদস্য' বলা হয়। সংবিধান অনুযায়ী শর্তসমূহ হচ্ছে নিম্নরূপ :

১. সংগঠনের লক্ষ্য ও উদ্দেশ্যকে জীবনের লক্ষ্য উদ্দেশ্য হিসেবে গ্রহণ করা।
২. সংগঠনের কর্মসূচি ও কর্মপদ্ধতির সাথে পূর্ণ ঐকমত্য পোষণ করা এবং তা বাস্তবায়নের প্রচেষ্টায় সক্রিয়ভাবে অংশগ্রহণ করা।
৩. সংবিধানকে মেনে চলা।
৪. ফরজ ও ওয়াজিবসমূহ যথাযথভাবে পালন করা।
৫. কবির গুনাহ থেকে বিরত থাকা।
৬. শিবিরের লক্ষ্য ও কর্মসূচির বিপরীত কোনো সংস্থার সাথে সম্পর্ক না রাখা।

এছাড়াও একজন 'সদস্য'কে অলিখিত বা ঐতিহ্যগত নিয়ম-শৃঙ্খলাসমূহ মেনে চলতে হয়। সদস্যরাই সংগঠনের মূল শক্তি। একটা ইমারত যেরূপ তার ভিত্তির ওপর দাঁড়িয়ে থাকে, ভিত্তির মজবুতির ওপর নির্ভর করে তদ্রূপ গোটা সংগঠন সদস্যদের সম্মিলিত শক্তির ওপর দাঁড়িয় থাকে। তাদের মধ্যে শিথিলতা এলে গোটা সংগঠনের ওপর স্বাভাবিকভাবেই তার প্রভাব তড়িৎবেগে ছড়িয়ে পড়ে। সদস্যগণই হচ্ছে সংগঠনের আসল প্রতিনিধি। তাদের পরিচয়ই সংগঠনের পরিচয়। ঈমানের অতুজ্জ্বল আলোকে তাদেরকে উদ্ভাসিত হতে হয় খোদাভীতির শক্তিতে তাদের বলীয়ান হতে হয়। আখিরাতে সীমাহীন ও অমূল্য পুরস্কারের আকর্ষণে তাদের জীবনটাই হয় গতিশীল ও দুর্নিবার। তাদের চারিত্রিক মাধুর্যের মহৎ প্রভাবে সমাজে সৃষ্টি হয় আলোড়ন। সংগঠনের স্বার্থে তাদেরকে ব্যক্তিগত স্বার্থ অকুষ্ঠচিত্তে কুরবানি করতে হয়। সংগঠনের নির্দেশ যেকোনো সময় যেকোনো পরিস্থিতিতে আন্তরিকতা ও নিষ্ঠার সাথে পালন করতে হয়, ত্যাগ-তিতিক্ষায় অগ্রগামী থেকে উজ্জ্বল দৃষ্টান্ত স্থাপন করতে হয়, জীবনকে প্রতিষ্ঠিত করতে হয় আল-কুরআনের বাস্তব প্রতিচ্ছবি হিসেবে।

'সদস্য' হওয়ার পদ্ধতি সংবিধানের ৫ নং ধারায় উল্লেখ রয়েছে। 'সদস্য' হওয়ার জন্য নির্ধারিত আবেদনপত্র কেন্দ্রীয় সভাপতি থেকে সংগ্রহ করতে হয়। কোনো কর্মী 'সদস্য' হওয়ার আবেদনপত্র পূরণ করলে স্থানীয় সভাপতি বা এলাকার দায়িত্বশীল তার মন্তব্যসহ কেন্দ্রীয় সভাপতির নিকট পাঠিয়ে দেন। আবেদনপত্র পূরণ করে পাঠানোর কিছুদিন পর কেন্দ্রীয় সভাপতি নির্দিষ্ট একটি 'প্রশ্নমালা' আবেদনকারীর নিকট পাঠান। আবেদনকারী তা পূরণ করে স্থানীয় সভাপতি বা এলাকার দায়িত্বশীলের মাধ্যমে কেন্দ্রীয় সভাপতির নিকট পাঠিয়ে দেন। কেন্দ্রীয় সভাপতি আবেদনকারীর আবেদন মঞ্জুর করে তাকে সংগঠনের

সদস্যভুক্ত করেন। এখানে উল্লেখযোগ্য যে, সাংগঠনিকভাবে যোগ্য করে গড়ে তোলার জন্যই জনশক্তিকে এরূপ বিভিন্ন পর্যায়ে বিভক্ত করা হয়েছে। এটি কোনো শ্রেণিবিভাগ নয় বরং আদর্শ কর্মী তৈরির বৈজ্ঞানিক পদ্ধতি মাত্র।

দ্বিতীয় দফা কর্মসূচিকে বাস্তবায়িত করার জন্য যে সমস্ত কাজ করতে হয় তা নিম্নে বর্ণনা করা হলো :

### কর্মী বৈঠক

মাসে প্রতিটি উপশাখায় একটি কর্মী বৈঠক অনুষ্ঠিত হবে। কর্মীদের ব্যক্তিগত মান উন্নয়ন এবং সংগঠনের উন্নতি ও গতিশীলতা অক্ষুন্ন রাখার জন্য নির্দিষ্ট কর্মসূচির ভিত্তিতে কর্মী বৈঠক করতে হয়। কর্মী বৈঠকের সর্বোচ্চ সময় ১ ঘণ্টা। কর্মী বৈঠকের কর্মসূচি নিম্নরূপ :

### কর্মসূচি

- |   |          |
|---|----------|
| ● অর্থসহ কুরআন তিলাওয়াত-                   | ৫ মিনিট  |
| ● ব্যক্তিগত রিপোর্ট পেশ, মন্তব্য ও পরামর্শ- | ২০ মিনিট |
| ● পরিকল্পনা গ্রহণ-                          | ২০ মিনিট |
| ● কর্মবন্টন-                                | ১০ মিনিট |
| ● সভাপতির বক্তব্য ও মুনাজাত-                | ৫ মিনিট  |

### সাথী বৈঠক

সাথী শাখাসমূহে প্রতি মাসে একবার সাথী বৈঠক করতে হবে। মাসের শুরু দিকে বৈঠক করলে ভালো হয়। সাথী বৈঠকের সর্বোচ্চ সময় ২ ঘণ্টা। সাথী বৈঠকের কর্মসূচি নিম্নরূপ হবে :

- |   |          |
|---|----------|
| ● দারসে কুরআন/দারসে হাদিস-                              | ২০ মিনিট |
| ● ব্যক্তিগত রিপোর্ট পেশ, পর্যালোচনা, মন্তব্য ও পরামর্শ- | ৩০ মিনিট |
| ● শাখার মাসিক রিপোর্ট পেশ ও পর্যালোচনা-                 | ২০ মিনিট |
| ● শাখার পরিকল্পনা গ্রহণ ও কর্মবন্টন-                    | ২০ মিনিট |
| ● বিবিধ আলোচনা-   | ২০ মিনিট |
| ● ইহতেসাব, সমাপনী/মুনাজাত-                              | ১০ মিনিট |

### সদস্য বৈঠক

সদস্য শাখাগুলোতে নিয়মিতভাবে মাসে একবার সদস্য বৈঠক করতে হবে। মাসের প্রথম দিকে বৈঠক হওয়া প্রয়োজন। বৈঠক নিরিবিলি জায়গায় ও

প্রয়োজনীয় সময় নিয়ে করতে হবে। এক্ষেত্রে অযথা সময়কে দীর্ঘায়িত করা অথবা সময়ের কার্পণ্য প্রদর্শন ক্ষতির কারণ হতে পারে। যেহেতু সদস্যরাই হচ্ছেন সংগঠনের প্রাণ সেহেতু ‘সদস্য বৈঠক’ সুচারুরূপে যথার্থ মেজাজে প্রয়োজনীয় গুরুত্ব দিয়ে করার ওপর কাজের গতিশীলতা নির্ভরশীল। সদস্য বৈঠকের কর্মসূচি নিম্নরূপ :

### কর্মসূচি

- দারসে কুরআন বা দারসে হাদিস
- ব্যক্তিগত রিপোর্ট পেশ ও পর্যালোচনা
- শাখার বিগত মাসের রিপোর্ট পেশ, পর্যালোচনা, মন্তব্য ও পরামর্শ
- মাসিক পরিকল্পনা প্রণয়ন ও কর্মকাণ্ড
- বিশেষ কোনো বিষয় থাকলে আলোচনা/বিবিধ আলোচনা
- ইহতেসাব
- সভাপতির বক্তব্য

### দায়িত্বশীল বৈঠক

থানা শাখা, সাখী শাখা, সদস্য শাখা ও জেলা শাখাসমূহ প্রতি মাসে একটি দায়িত্বশীল বৈঠক করবে। দায়িত্বশীল বৈঠকের সর্বোচ্চ সময় ৩ ঘণ্টা হওয়া বাঞ্ছনীয়। এ বৈঠকের কর্মসূচি নিম্নরূপ হবে :

### কর্মসূচি

- |  |                  |
|--|------------------|
| ● অর্থসহ কুরআন তিলাওয়াত-                              | ১০ মিনিট         |
| ● বিগত মাসের রিপোর্ট পেশ,<br>পর্যালোচনা ও পরামর্শ দান- | ১ ঘণ্টা ৩০ মিনিট |
| ● মাসিক পরিকল্পনা গ্রহণ-                               | ৪০ মিনিট         |
| ● বিবিধ আলোচনা-  | ৩০ মিনিট         |
| ● সমাপনী ও মুনাজাত-                                    | ১০ মিনিট         |

### কর্মী যোগাযোগ

কর্মীদের মধ্যকার সম্পর্ক গভীর করা, একে অন্যকে জানা, নিষ্ক্রিয় কর্মীকে সক্রিয় করা, সক্রিয় কর্মীকে আরও অগ্রসর করা, ভুল বোঝাবুঝি দূর করা প্রভৃতি উদ্দেশ্যে কর্মী যোগাযোগ করতে হয়। কর্মী যোগাযোগ শিবিরের কার্যাবলির মধ্যে বিশেষ গুরুত্বের দাবিদার। এজন্য সুনির্দিষ্ট পদ্ধতি অনুসরণ করা প্রয়োজন

নিম্নে তা উল্লেখ করা হলো :

- ক. পরিকল্পনা : দিনে, সপ্তাহে বা মাসে কোন কোন কর্মীর সাথে যোগাযোগ করা হবে তার পরিকল্পনা থাকতে হবে।
- খ. স্থান ও সময় নির্বাচন : যার সাথে যোগাযোগ করা হবে তিনি কখন সময় দিতে পারেন, আলোচনার জন্য কোন ধরনের স্থান পছন্দ করেন তা জেনে সময় ও স্থান নির্ধারণ করতে হবে। মনে রাখতে হবে যে, কাউকে কোনো কথা বলতে হলে বা কোনো কথা শুনতে হলে তিনি যে ধরনের পরিবেশ পছন্দ করেন তা সৃষ্টি করতে হবে।
- গ. ঐকান্তিকতা : যার সাথে যোগাযোগ করা হবে তার ব্যাপারে আন্তরিকতার পরিচয় দিতে হবে। তিনি যখন বুঝতে পারবেন যে, যোগাযোগকারী তার শুভাকাঙ্ক্ষী তখন তিনি প্রতিটি কথার গুরুত্ব দেবেন। নির্ভেজাল ঐকান্তিকতাই এ ধরনের মানসিকতা সৃষ্টির সহায়ক।
- ঘ. ব্যক্তিগত ও পারিবারিক সমস্যা আলোচনা : প্রথম তার ব্যক্তিগত ও পারিবারিক সমস্যার প্রতি নজর দিতে হবে। সম্ভব হলে তা সমাধান করতে হবে। কমপক্ষে সঠিক পরামর্শ দিতে হবে এবং সহানুভূতিশীল মনোভাব প্রকাশ করতে হবে।
- ঙ. সাংগঠনিক আলোচনা : এরপর তার সাথে সাংগঠনিক বিষয়ে আলোচনা করতে হবে। ক্রটি পরিলক্ষিত হলে সংশোধনের চেষ্টা করতে হবে।
- চ. সার্বিক আন্দোলনের আলোচনা : কর্মীর চিন্তার ব্যাপকতা ও দায়িত্বানুভূতি বৃদ্ধির জন্য আন্দোলনের বিভিন্ন দিক নিয়ে আলোচনা করা যেতে পারে।
- ছ. সালাম ও দুআ বিনিময় : পরিশেষে পারস্পরিক সালাম ও দুআ বিনিময় করে বিদায় নিতে হবে।

### বায়তুলমাল

সংগঠনের কাজ পরিচালনার জন্য প্রতিটি শাখায় বায়তুলমাল থাকতে হবে। কারণ, বায়তুলমাল সংগঠনের মেরুদণ্ড। আপনাআপনি বায়তুলমাল গড়ে উঠবে না। কর্মীদের ত্যাগ ও সক্রিয় প্রচেষ্টার বিনিময়েই তা গড়ে ওঠে।

### বায়তুলমালের আয়ের উৎস প্রধানত দুটি

প্রথমত : সংগঠনের কর্মীদের এয়ানত। প্রত্যেক কর্মীকে নির্ধারিত হারে প্রতি মাসে বায়তুলমালে নিয়মিত এয়ানত দিতে হয়। এয়ানতের হার কর্মী নিজেই

নির্ধারণ করবেন। আর্থিক কুরবানির জন্য ইনফাক ফি সাবিলিল্লাহর আহবানকে সামনে রেখেই এ হার নির্ধারণ করতে হবে।

**দ্বিতীয়ত :** শুভাকাঙ্ক্ষীদের কাছ থেকে প্রাপ্ত আর্থিক সহযোগিতা আয়ের দ্বিতীয় উৎস। একদিকে দিন দিন শুভাকাঙ্ক্ষীদের সংখ্যাবৃদ্ধির প্রতি নজর দিতে হবে, অপরদিকে কেউ যেন অর্থের বিনিময়ে কোনো স্বার্থ হাসিল করতে না পারে সেদিকেও লক্ষ রাখতে হবে।

এছাড়াও জাকাত এবং ওশর বায়তুলমালের আয়ের উৎস হতে পারে। তবে এসব আদায় করার পূর্বে উর্ধ্বতন সংগঠনের অনুমতি নিতে হবে। এ খাতের আয়-ব্যয়ের হিসাব স্বতন্ত্রভাবে রাখতে হবে। প্রত্যেক অধস্তন শাখাকে নিয়মিতভাবে নির্ধারিত হারে উর্ধ্বতন সংগঠনের মাসিক এয়ানত দিতে হবে, তারপর অন্য কাজ। উর্ধ্বতন সংগঠনকে দুর্বল করে যত কাজই করা হোক না কেন তাতে ফল পাওয়ার সম্ভাবনা খুবই কম।

মাসিক কর্মীসভায় নিয়মিতভাবে বায়তুলমালের রিপোর্ট পেশ করতে হবে। প্রয়োজনের প্রেক্ষিতে কেন্দ্রীয় সভাপতি যেকোনো সময় বায়তুলমালের যাবতীয় রেকর্ড পরিদর্শন করবেন বা করাবেন এবং বায়তুলমালের স্বচ্ছতা ও জবাবদিহিতা নিশ্চিত করার লক্ষ্যে সংগঠনের সকল পর্যায়ে উর্ধ্বতন সংগঠনের পক্ষ থেকে নিয়মিত অডিট করা হবে।

### সাংগঠনিক সফর

সংগঠনের কাজকে ভালোভাবে বুঝিয়ে দেওয়ার জন্য কোনো সাংগঠনিক সমস্যা বা জটিলতা দূর করার প্রয়োজনে এবং স্থানীয় কোনো প্রোগ্রামে অংশগ্রহণ করার জন্য উর্ধ্বতন সংগঠন থেকে অধস্তন শাখাগুলোতে নিয়মিত সফর করা হয়। তবে বিশেষ কোনো প্রোগ্রাম রাখতে হলে পূর্বেই উর্ধ্বতন সংগঠনের সাথে যোগাযোগ করে অনুমোদন নিতে হয়। সফরের ব্যয়ভার সফরকৃত শাখাগুলোকেই বহন করতে হয়।

### পরিচালক নির্বাচন

সদস্য শাখা ও সাথী শাখায় প্রতি সেশনের শুরুতে নতুন করে সভাপতি নির্বাচিত হন। নির্বাচনের সময় সংবিধানের ৩৪ নং ধারায় বর্ণিত পরিচালকের গুণাবলির প্রতি নজর রাখতে হবে। সভাপতি নির্বাচিত হওয়ার পর কাজের সুবিধার জন্য কর্মীদের পরামর্শক্রমে বিভিন্ন দায়িত্বশীল ব্যক্তি নিযুক্ত করবেন। যেমন :

১. সাধারণ সম্পাদক
২. অর্থ সম্পাদক
৩. অফিস সম্পাদক
৪. পাঠাগার সম্পাদক
৫. প্রচার সম্পাদক
৬. প্রকাশনা সম্পাদক

শাখার অধীনে উপশাখার পরিচালক কর্মীদের পরামর্শক্রমে সভাপতি কর্তৃক নিযুক্ত হবেন।

### পরিকল্পনা

পরিকল্পনার ভিত্তিতে কাজ করা মজবুত সংগঠনের পরিচয়। পরিকল্পনা প্রণয়নের সময় নিম্নোক্ত বিষয়গুলোর প্রতি সতর্ক নজর রাখতে হবে :

১. জনশক্তি (শ্রেণি বিন্যাসসহ)
২. কর্মীদের মান
৩. কাজের পরিধি ও পরিসংখ্যানমূলক তথ্য
৪. অর্থনৈতিক অবস্থা
৫. পারিপার্শ্বিক অবস্থা
৬. বিরোধীশক্তির তৎপরতা

কর্মী, সাথী বা সদস্যদের বৈঠকে তাদের পরামর্শক্রমে পরিকল্পনা প্রণয়ন করতে হবে।

মোটকথা পরিকল্পনা প্রণয়নে পরামর্শকে প্রাধান্য দিতে হবে আর উর্ধ্বতন সংগঠনের অনুমোদনের পরই পরিকল্পনা বাস্তবায়নের জন্য চূড়ান্ত হবে। (অধস্তন শাখাগুলো মাসিক, দ্বিমাসিক পরিকল্পনা প্রণয়ন করবে)।

### রিপোর্টিং

পরিকল্পনা অনুমোদন হওয়ার পর কাজের সুষ্ঠু পর্যালোচনার জন্য নিয়মিত রিপোর্ট প্রণয়ন অপরিহার্য। রিপোর্টের ওপর সামষ্টিক পর্যালোচনা বাঞ্ছনীয়। অধস্তন সংগঠনগুলো নিয়মিতভাবে উর্ধ্বতন সংগঠনে রিপোর্ট প্রেরণ করবে।

## তৃতীয় দফা কর্মসূচি : প্রশিক্ষণ

‘এই সংগঠনের অধীনে সংঘবদ্ধ ছাত্রদের ইসলামী জ্ঞান প্রদান এবং আদর্শ চরিত্রবানরূপে গড়ে তুলে জাহেলিয়াতের সমস্ত চ্যালেঞ্জের মোকাবেলায় ইসলামের শ্রেষ্ঠত্ব প্রমাণ করার যোগ্যতাসম্পন্ন কর্মী হিসেবে গড়ার কার্যকর ব্যবস্থা করা।’

অর্থাৎ সংঘবদ্ধ ছাত্রদের প্রশিক্ষণের ব্যবস্থা করা। একদল ছাত্রকে শুধু সংঘবদ্ধ করলেই আমাদের কাজ শেষ হয় না। প্রকৃতপক্ষে এখান থেকেই আমাদের কাজ শুরু। যারা আমাদের সাথে সংগ্রাম করার প্রতিশ্রুতি দিলেন তাদেরকে ইসলামী জীবনব্যবস্থা ও জাহেলিয়াতের তুলনামূলক জ্ঞানার্জনে সাহায্য করা আমাদের ঈমানি দায়িত্ব। তাদের এমনভাবে গড়ে তোলা যাতে তারা জাহেলিয়াতের যাবতীয় চ্যালেঞ্জ সাহসিকতা যুক্তি ও কৌশল প্রয়োগে মোকাবিলা করতে পারেন। এমন প্রশিক্ষণ দেওয়া যেন তারা ইসলামকে একমাত্র বাস্তব আদর্শ হিসেবে বুঝতে পারেন এবং পেশ করতে পারেন। তাদের এমনভাবে গড়ে তুলতে হবে যেন তারা অনুপম চারিত্রিক মাধুর্যের অধিকারী হতে পারেন। প্রত্যেকে যেন আল কুরআনের আলোকে নিজেদের গড়ে তুলে জাতিতে সঠিক নেতৃত্ব দেওয়ার মতো যোগ্যতা অর্জন করতে এবং বৃহত্তর ইসলামী আন্দোলনে ফলপ্রসূ ভূমিকা পালন করতে পারেন। জীবনের শেষ মুহূর্ত পর্যন্ত শত বাধা বিপত্তির ভেতর দিয়েও যেন তারা আল্লাহর কাছে আত্মসমর্পণ করে থাকতে পারেন।

এছাড়াও শরীরচর্চা, খেলাধূলা ও চিত্তবিনোদনমূলক প্রোগ্রামের আয়োজন করে সংঘবদ্ধ ছাত্রদের দৈহিক ও মানসিক শক্তির বিকাশ ঘটাতে হবে। এ দফার সাফল্যজনক বাস্তবায়নের ওপরই সংগঠনের শক্তি, সাংগঠনিক মজবুতি, কর্মী ও দায়িত্বশীল তৈরি নির্ভরশীল। নিম্নোক্ত কাজগুলো এ দফায় অন্তর্ভুক্ত :

- ক. পাঠাগার প্রতিষ্ঠা
- খ. ইসলামী সাহিত্য পাঠ ও বিতরণ
- গ. পাঠচক্র, আলোচনা চক্র, সামষ্টিক পাঠ ইত্যাদি
- ঘ. শিক্ষাশিবির, শিক্ষাবৈঠক
- ঙ. স্পিকারস ফোরাম
- চ. লেখকশিবির
- ছ. শববেদারি বা নৈশ ইবাদত
- জ. সামষ্টিক ভোজন
- ঝ. ব্যক্তিগত রিপোর্ট সংরক্ষণ
- ঞ. দুআ ও নফল ইবাদত



- ট. ইহতেসাব বা গঠনমূলক সমালোচনা  
 ঠ. আত্মসমালোচনা  
 ড. কুরআন তালিম/কুরআন ক্লাস

### ক. পাঠাগার প্রতিষ্ঠা

আমাদের সংগঠন জ্ঞানের রাজ্যে এক দৃষ্টান্ত স্থাপন করতে চায়। যেহেতু এটা একটা আদর্শবাদী আন্দোলন, সেহেতু আদর্শের যথার্থ জ্ঞানের প্রতি প্রাধান্য দেওয়া হয়ে থাকে। এ কারণেই যেখানেই সংগঠন রয়েছে সেখানেই কর্মীদেরকে নিজেদের ও অন্যান্যদের আর্থিক সহযোগিতায় একটি পাঠাগার স্থাপন করতে হয়। বইপত্রের যথার্থ হিসেব, পাঠ্য ও ইস্যুকৃত বইয়ের হিসেব সংরক্ষণের জন্য উপযুক্ত ব্যবস্থাাদি গ্রহণ করতে হবে। একজন সম্পাদকের তত্ত্বাবধানে পাঠাগার পরিচালিত হয়। পাঠাগারকে ক্রমান্বয়ে মজবুত করার জন্য প্রতি মাসেই পরিকল্পনার ভিত্তিতে বইপত্র কিনতে হয়।

### খ. ইসলামী সাহিত্য পাঠ ও বিতরণ

ইসলামী জীবনব্যবস্থার ওপর বা এর কোনো দিক যথা : নামাজ, রোজা, ঈমান, তাকওয়া, অর্থনীতি, সমাজনীতি, রাজনীতি ইত্যাদি বিষয়কে কেন্দ্র করে কুরআন ও হাদিসের ওপর ভিত্তি করে যে সাহিত্য রচিত হয় তা ইসলামী সাহিত্য। আবার ইসলামী জীবনব্যবস্থাকে প্রতিষ্ঠা করার জন্য যে আন্দোলন সে আন্দোলনসংক্রান্ত যাবতীয় সাহিত্যও ইসলামী সাহিত্য। পাঠাগার থেকে নিয়মিত বই নিয়ে কর্মীদের পড়তে হয়। প্রত্যেক কর্মীর নিকট দাওয়াতি কাজের বইগুলো থাকা একান্ত বাঞ্ছনীয়। যেকোনো কর্মীকে বই বিতরণের পূর্বে বইটি নিজে পড়ে নিতে হয়; যেন যার নিকট বিতরণ করা হলো তার সাথে উক্ত বই সম্পর্কে সঠিক আলোচনা করা যায় এবং তার বিভিন্ন প্রশ্নের উত্তর দেওয়া সম্ভব হয়। মনে রাখা দরকার যে, জ্ঞানই মানুষের চিন্তার পরিশুদ্ধি আনে। তাই যত বেশি নিজে পড়া যায় ও অন্যান্যদের পড়ানো যায় ততই বেশি কর্মী তৈরি হয়। পাঠকের মানসিকতা না বুঝে বই বিতরণ করলে উলটো ফল হওয়ার আশঙ্কা থাকে।

### গ. পাঠচক্র

পাঠচক্র মানে কয়েকজন মিলে কোনো বই বা বিষয় আলোচনা করে গভীরভাবে বুঝার চেষ্টা করা এবং পরস্পরের চিন্তার বিনিময় করা। মানুষের চিন্তা ও গ্রহণশক্তি সীমাবদ্ধ। কোনো একটি বই বা বিষয় একা একা পড়ে যথার্থ হৃদয়ঙ্গম করা যায় না। এজন্য প্রয়োজন মানুষের চিন্তাশক্তির সংমিশ্রণ। পাঠচক্র থেকে আমরা এ উপকার পেতে পারি। পাঠচক্র চিন্তা ও গবেষণাসুলভ দৃষ্টিভঙ্গির জন্য দেয়। এতে যুক্তি ও বুদ্ধির দীপ্তি বৃদ্ধি পায়। অপরকে বোঝানোর উৎসাহ ও যোগ্যতা বাড়ে। প্রত্যেক শাখায় পাঠচক্রের আয়োজন একান্ত জরুরি। এক্ষেত্রে

পূর্বাঙ্কে কেন্দ্রের অনুমতি নেওয়া প্রয়োজন। যথার্থ নিয়মনীতি মেনে না চললে পাঠচক্র তেমন কোনো লাভ হয় না। এজন্য চক্রের ক্ষেত্রে নিম্নোক্ত নিয়মাবলি মেনে চলতে হয় :

১. চক্রের সদস্য সংখ্যা পূর্বনির্ধারিত থাকবে।
২. প্রতিটি চক্র কমপক্ষে তিন মাস চালু রাখতে হবে।
৩. চক্রের মাসে অন্তত একটি অধিবেশন হবে।
৪. অধিবেশন দেড় ঘণ্টা থেকে দুই ঘণ্টা স্থায়ী হতে পারে।

এছাড়াও প্রয়োগ পদ্ধতি হিসেবে নিম্নোক্ত শর্তসমূহ মেনে চলা আবশ্যিক—

- ক. সদস্য নির্দিষ্টকরণ : প্রতিটি চক্রের জন্য সমমানের কর্মী বাছাই করতে হবে। প্রত্যেকে যেন ঈমান, জ্ঞান, তাকওয়া ও সাংগঠনিক দৃষ্টিকোণ থেকে সমমানের হয়।
- খ. পরিচালক নির্ধারণ : কেন্দ্রীয় সভাপতির প্রতিনিধি পাঠচক্রের পরিচালক হবেন।
- গ. বিষয়বস্তু নির্ধারণ : বছরের শুরুতে একটি নির্ধারিত সিলেবাস প্রণীত হবে।
- ঘ. লক্ষ্য নির্ধারণ : পূর্বেই পাঠচক্রের লক্ষ্য কী, তা ঠিক করে নিতে হবে। পাঠচক্র চলাকালে লক্ষ্যের প্রতি সতর্ক দৃষ্টি রাখতে হবে যেন চক্র শেষে লক্ষ্যে পৌছা যায়।
- ঙ. অধ্যয়ন : পাঠচক্রের জন্য অধ্যয়ন বিশ্লেষণমূলক হতে হবে।
- চ. নোট : চক্রের সদস্যগণ বই বা বিষয়বস্তুর ওপর নোট রাখবেন। একে বই বা বিষয়বস্তু অধ্যয়ন করা হলো তার শিক্ষণীয় বিষয়সমূহ। দুই অধ্যয়নকালে যে সমস্ত প্রশ্ন মনে জাগে।
- ছ. সময়ানুবর্তিতা।
- জ. মনোযোগ : চক্র চলাকালে মনোযোগ সহকারে শ্রবণ করা ও সুস্পষ্টভাবে বক্তব্য পেশ করা প্রয়োজন।
- ঝ. সক্রিয় সহযোগিতা : শুধু পরিচালক প্রশ্ন করলেই চলবে না। সদস্যদেরকে স্বতঃস্ফূর্তভাবে প্রশ্ন করতে হবে। গোটা চক্রকে কার্যকর করার জন্য সম্মিলিত প্রচেষ্টা চালাতে হবে।

## কর্মসূচি

- উদ্বোধন- ৫ মিনিট
- নির্ধারিত বিষয়ের ওপর আলোচনা- ১ ঘণ্টা
- পূর্বনির্ধারিত বিষয়ের ওপর দেওয়া কাজ আদায়- ২০ মিনিট
- শেষ কথা ৫ মিনিট

## আলোচনা চক্র (কর্মীদের)

বাছাইকৃত কর্মীদের মানোন্নয়নের লক্ষ্যে বিভিন্ন বিষয় ও বইয়ের ওপর একজন পরিচালকের অধীন নির্দিষ্ট সংখ্যক সদস্য নিয়ে আলোচনাচক্র অনুষ্ঠিত হবে। আলোচনাচক্রের সর্বোচ্চ সময় হবে ১ ঘণ্টা। এতে নিম্নের কর্মসূচি থাকবে :

## কর্মসূচি

- উদ্বোধন- ৫ মিনিট
- নির্ধারিত বই বা বিষয়ের ওপর আলোচনা- ৪৫ মিনিট
- প্রশ্নোত্তর- ১০ মিনিট

## আলোচনা চক্র (সাথীদের)

সাথীদের মানোন্নয়ন, কোনো বিষয় বা বই অনুধাবন ও পারস্পরিক মত বিনিময়ের মাধ্যমে চিন্তার ঐক্যসাধনের লক্ষ্যে বাছাইকৃত সাথীদের নিয়ে সাথী আলোচনা চক্র অনুষ্ঠিত হবে। একজন পরিচালকের অধীনে নির্দিষ্ট সংখ্যক সদস্য নিয়ে নির্দিষ্ট বই বা বিষয়ের ওপর আলোচনা চক্র হবে। চক্রের সর্বোচ্চ সময় দেড় থেকে দুই ঘণ্টা হতে পারে।

## কর্মসূচি

- উদ্বোধন- ৫ মিনিট
- নির্ধারিত বিষয়ের ওপর আলোচনা- ১ ঘণ্টা
- নির্ধারিত বিষয়ের ওপর দেওয়া কাজ আদায়- ২০ মিনিট
- শেষ কথা- ৫ মিনিট

## সামষ্টিক পাঠ

কুরআন, হাদিস, কোনো একটি বই বা তার অংশবিশেষ সমষ্টিগতভাবে পালাক্রমে পাঠ ও আলোচনা করা মানেই সামষ্টিক পাঠ। এতে কোনো বই বা বইয়ের অংশবিশেষ সহজভাবে বোঝা যায়। ৭/৮ জন সদস্য মিলে অধ্যয়ন করতে হয়। এর কোনো ভিন্ন ভিন্ন অধিবেশন হয় না। নতুন কর্মী ও সক্রিয় সমর্থকদের নিয়ে সামষ্টিক পাঠ করা বেশি প্রয়োজন। সামষ্টিক পাঠে সর্বোচ্চ ১ ঘণ্টা সময় নেওয়া যায়। এর কর্মসূচি নিম্নোরূপ :

## কর্মসূচি

- অর্থসহ কুরআন তিলাওয়াত- ৫ মিনিট
- নির্দিষ্ট বিষয় অথবা বইয়ের ওপর আলোচনা- ৪০ মিনিট
- বিবিধ বিষয়ে আলোচনা- ১৫ মিনিট

## ঘ. শিক্ষাশিবির

জনশক্তির চরিত্র ও স্বভাব সংশোধন, ভ্রাতৃত্ববোধ সৃষ্টি, ইসলামী জ্ঞান অর্জনের ব্যবস্থা, নেতৃত্বের দক্ষতা, সাংগঠনিক প্রজ্ঞা, কৌশলগত যোগ্যতা বৃদ্ধি, ভারসাম্যপূর্ণ জীবনগঠনে উদ্বুদ্ধ করা, কোনো বিশেষ বিষয়ে বিশেষজ্ঞ হিসেবে গড়ে তোলা ইত্যাদির লক্ষ্যে সময় নিয়ে যে কর্মসূচি তাই শিক্ষাশিবির। আমাদের সাংগঠনিক জীবনে এরূপ শিক্ষাশিবিরের গুরুত্ব অত্যধিক। শিক্ষাশিবিরের জন্য নির্দিষ্ট জায়গার ব্যবস্থা করতে হয়। নির্বাচিত জনশক্তিই এতে অংশগ্রহণ করবে। এতে একসঙ্গে থাকা, খাওয়া, নামাজ পড়া, আলোচনা শোনা প্রভৃতি কাজের উপযোগী পরিবেশ প্রয়োজন। শিক্ষাশিবিরের জন্য পূর্বেই উর্ধ্বতন সংগঠনের অনুমতি নিতে হয়। এর কর্মসূচি উর্ধ্বতন সংগঠনের অনুমোদনের পরই চূড়ান্ত হয়।

## শিক্ষাশিবিরের ধরন

ক্রম	খোঁজামের ধরন	দিবস	অংশগ্রহণকারী
১	দক্ষতা উন্নয়ন শিক্ষাশিবির	৭-১৫ দিন	সর্বোচ্চ ৩০ জন
২	দায়িত্বশীল শিক্ষাশিবির	৫-১০ দিন	সর্বোচ্চ ৫০ জন
৩	সাধারণ শিক্ষাশিবির (সদস্য/সাথী)	২-৩ দিন	সর্বোচ্চ ১০০ জন হওয়াই বাঞ্ছনীয়
৪	অগ্রসর কর্মী শিক্ষাশিবির	২ দিন	সর্বোচ্চ ১০০ জন হওয়াই বাঞ্ছনীয়
৫	স্কুল কর্মীদের শিক্ষাশিবির [বৃহস্পতিবার বাদ আসর শুরু, শুক্রবার সন্ধ্যার মধ্যে শেষ]	১ দিন	সর্বোচ্চ ১০০ জন হওয়াই বাঞ্ছনীয়

## শিক্ষাবৈঠক

কর্মী বা সক্রিয় সমর্থকদের কাছে ইসলামের যথার্থ পরিচয় তুলে ধরা, ইসলামী আন্দোলনের সঠিক ধারণা ও গুরুত্ব পরিষ্কার করা, কোনো বিশেষ বিষয়ে দক্ষতা বৃদ্ধি বা ধারণা পরিষ্কার করার লক্ষ্যে ৩ থেকে ৪ ঘণ্টার কর্মসূচিই শিক্ষাবৈঠক। নির্দিষ্ট সংখ্যক নির্ধারিত কর্মী এতে যোগদান করেন। যেখানে কর্মী বেশি সেখানে একাধিক শিক্ষাবৈঠক হতে পারে। সম্ভব হলে প্রতি মাসেই শিক্ষাবৈঠক হওয়া প্রয়োজন।

শিক্ষাশিবির ও শিক্ষাবৈঠকের ক্ষেত্রে নিম্নলিখিত বিষয়গুলোর দিকে নজর রাখা প্রয়োজন :

১. শিক্ষাশিবির ও শিক্ষাবৈঠকের শিক্ষার্থী নির্বাচনে মানের সমতার প্রতি লক্ষ্য রাখা। (মেধা, অভিজ্ঞতা, বয়স, সাংগঠনিক মান)
২. প্রশিক্ষক নির্বাচনে সংশ্লিষ্ট বিষয়ে ব্যক্তির আমল, জ্ঞানের গভীরতা, অভিজ্ঞতা, উদ্ভাবনী ও বিশ্লেষণী শক্তি, বক্তব্য উপস্থাপনে কৌশলগত দক্ষতা, সময় ও পরিবেশ অনুধাবনের ক্ষমতা ইত্যাদি গুণের প্রতি বিশেষভাবে নজর দেওয়া দরকার।
৩. শিক্ষাশিবির ও শিক্ষাবৈঠককে আলোচনা প্রধান না করে কর্মশালা, ব্রেইন স্টর্ম ও গ্রুপ আলোচনাজাতীয় হাতে কলমে প্রশিক্ষণ/অনুশীলন কর্মসূচির সাথে সামঞ্জস্যশীল করতে হবে।
৪. শিক্ষাশিবিরে আলোচনার সংখ্যা কমিয়ে পর্যাপ্ত সময় দিয়ে সংশ্লিষ্ট বিষয়ে পূর্ণাঙ্গ ধারণা প্রদানের ব্যবস্থা থাকতে হবে।
৫. শিক্ষাশিবির ও বৈঠকে আলোচনা বক্তাকেন্দ্রিক না হয়ে অংশগ্রহণধর্মী হওয়া প্রয়োজন। আলোচনাকালে শিক্ষার্থীদের অবদান রাখার সুযোগ দিতে হবে।
৬. কমপক্ষে ৩ মাস পূর্বে শিক্ষাশিবির ও ২ মাস পূর্বে শিক্ষাবৈঠকের বিস্তারিত পরিকল্পনা হয়ে যাওয়া দরকার। শিক্ষাশিবিরের কমপক্ষে ২ মাস পূর্বে বক্তা, স্থান ইত্যাদি নিশ্চিত হওয়া, শিক্ষার্থীদের প্রয়োজনীয় বিষয় অবহিত করা ইত্যাদি কাজ সম্পন্ন হতে হবে।
৭. বিশেষ শিক্ষাশিবিরসমূহের লক্ষ্যমাত্রার আলোকে পূর্বাঙ্কেই সিলেবাস তৈরি করে কমপক্ষে ২ মাস পূর্বে তা নির্ধারিত শিক্ষার্থী ও প্রশিক্ষকদের কাছে পৌঁছাতে ও তাদের প্রস্তুতি নিশ্চিত করার ব্যবস্থা করতে হবে।
৮. শিক্ষাশিবির ও শিক্ষাবৈঠকে পারতপক্ষে ওভারহেড প্রজেক্টর, কিপ চার্ট ইত্যাদি আধুনিক সরঞ্জামাদি ব্যবহার করা দরকার।
৯. বিশেষ করে শিক্ষাশিবিরে আলোচনা, আলোচক, শিক্ষার্থী এবং সামগ্রিক প্রশিক্ষণ কর্মসূচির ওপর মূল্যায়ন করার ব্যবস্থা রাখতে হবে।
১০. প্রশিক্ষকগণ প্রশিক্ষণকালে শিক্ষার্থীদের সাথে সহজ ও বন্ধুত্বপূর্ণ পরিবেশ তৈরি করবেন যাতে শিক্ষার্থীরা নিঃসঙ্কেচে মতপ্রকাশ ও প্রশ্ন করতে পারে।
১১. আলোচনা/প্রশিক্ষণের বিষয় নির্ধারণের ক্ষেত্রে দ্বীনি বিষয়ের পাশাপাশি প্রতিযোগিতামূলক পৃথিবীতে শ্রেষ্ঠত্ব অর্জনের জন্য প্রয়োজনীয় দৈনন্দিন বাস্তব ও সমকালীন বিষয়সমূহ রাখা।
১২. বিগত প্রোগ্রামের ত্রুটি-বিচ্যুতিকে সামনে রেখে পরবর্তী প্রোগ্রামের মানোন্নয়ন করা।

### ঙ. স্পিকারস ফোরাম

বক্তা তৈরির উদ্দেশ্যে গঠিত হয় স্পিকারস ফোরাম। কয়েকজন মিলে একটি ফোরাম করতে হয়। ফোরামের অধিবেশন সাপ্তাহিক, পাক্ষিক বা মাসিক হতে পারে। প্রয়োজনবোধে একই সপ্তাহে দু-তিন অধিবেশনও হতে পারে। ফোরামের একজন সভাপতি থাকবেন। তিনি সদস্যদের মধ্য থেকেও হতে পারেন। তবে বক্তৃতায় অভিজ্ঞ হতে হবে। নির্দিষ্ট বিষয়ের ওপর সদস্যরাও নির্দিষ্ট সময় পর্যন্ত বক্তৃতা করবেন। সভাপতি ভুল-ত্রুটি উল্লেখ করে দেবেন এবং পরামর্শ দেবেন। স্পিকারস ফোরামের মাধ্যমে কর্মীদের মধ্যে বক্তৃতাশিল্প সম্পর্কে জ্ঞান জন্মে।

### চ. লেখক শিবির

আমাদের সংগঠন যুবসমাজের সৃজনশীল প্রতিভার বিকাশ সাধনে সদা তৎপর। এ কারণে সাহিত্যমোদী ছাত্রদের নিয়ে লেখক শিবির করা যেতে পারে। স্বরচিত কবিতা, প্রবন্ধ, গল্প ইত্যাদির আসর জমানো এ শিবিরের কাজ। সমকালীন সাহিত্যের গতিধারা, ইসলামী সাহিত্য সৃষ্টি সম্পর্কে আলোচনা অনুষ্ঠানও এর কাজ। লেখক শিবিরের তরফ থেকে দেয়াল পত্রিকা, পত্রিকা, সাময়িকী ইত্যাদি প্রকাশ করা যেতে পারে। তবে এর পূর্বে উর্ধ্বতন সংগঠনের অনুমোদন নিতে হবে।

### ছ. শববেদারি বা নৈশ ইবাদত

আল্লাহর সাহায্য ও অনুগ্রহ আমাদের একমাত্র আশা-ভরসা ও শক্তির উৎস। আর আল্লাহর সাহায্য বেশি বেশি পাওয়া যায় তার সাথে নিবিড় সম্পর্ক গড়ে ওঠার ভেতর দিয়ে। প্রতিটি কর্মে প্রতিটি মুহূর্তে তাঁর ভয়ে হৃদয়মন কম্পিত থাকা প্রয়োজন। তাঁর স্মরণে অন্তর সদা জাগ্রত থাকা চাই। এজন্য বিশেষ বিশেষ ইবাদত অনুষ্ঠানের প্রয়োজন। রাতের নিবিড় পরিবেশে যখন সবাই ঘুমিয়ে থাকে, সবাই যখন বিশ্রাম ও আরামের কোলে নিবিষ্ট হয়ে থাকে, তখন আপনি উঠুন। আপনি আপনার হৃদয়-মন দিয়ে রাব্বুল আলামিনের অতি নিকটে, তার সান্নিধ্যে চলে যান। হৃদয়ের অনুভূতি দিয়ে বলে উঠুন,

‘আল্লাহুমা লা কা আস্লামতু ওয়া বিকা আমানতু, ওয়া আলাইকা তাওক্কালতু  
ওয়া ইলাইকা আনাবতু ওয়া বিকা আসামতু, ওয়া ইলাইকা হাকামতু’

হে আল্লাহ আমি তোমার কাছে আত্মসমর্পণ করলাম, তোমার ওপর  
আস্থা স্থাপন করলাম, তোমার ওপর ভরসা করলাম, তোমার দিকে  
আমার মনকে সম্পূর্ণ নিবিষ্ট করলাম, তোমার জন্য সংগ্রাম, সাধনা ও  
আমার আন্দোলন এবং তোমারই কাছে আমার ফরিয়াদ।

শত জটিল বাধা অতিক্রম করে আমাদেরকে এ কষ্টকাঙ্ক্ষী পথ চলতে হয়। সে জন্য আল্লাহর সান্নিধ্যে আসা প্রয়োজন। আল কুরআনে মুমিনদের পরিচয় দিয়ে আল্লাহ বলেছেন—

‘ওরা ধৈর্যশীল, সত্যবাদী, বিনয়ী, আল্লাহর পথে খরচ করে এবং রাত্রির শেষভাগে মাগফিরাতের জন্য কাঁদে।’ (সূরা আলে ইমরান : ১৭)

এদিকে লক্ষ রেখেই কর্মীদের মধ্যে খোদাভীতির সৃষ্টি এবং তার উৎকর্ষ সাধনের জন্য আমাদের সংগঠনে শববেদারির ব্যবস্থা রয়েছে। এতে নির্বাচিত কর্মীরা যোগদান করেন। যোগদানকারীর সংখ্যা খুব কম অথবা খুব বেশি হওয়া ঠিক নয়। শববেদারি কোনো মসজিদে বা সুবিধাজনক স্থানে সারা রাত বা রাতের শেষ তিন-চার ঘণ্টার জন্য হবে। এতে এক ঘণ্টাব্যাপী দারসে কুরআন অথবা দারসে হাদিস, একটি আলোচনা, তাহাজ্জুদের নামাজ, দুআ ইত্যাদির ব্যবস্থা থাকে।

এ প্রোগ্রাম সাধারণত এশার নামাজের পর থেকে শুরু হয়। মাঝখানে একটু ঘুমিয়ে আবার শেষ রাতে উঠতে হয়। শববেদারির আলোচনার বিভিন্ন বিষয়— খোদাভীতি, আল্লাহর আজাব নাজিলের বিধি, তওবা, দুআ, ইসলামী আন্দোলনের কর্মীদের অগ্নিপরীক্ষা প্রভৃতি সম্পর্কিত হতে হয়। শববেদারির সাফল্য নির্ভর করে পরিবেশ বজায় রাখার ওপর। শববেদারিতে সাংগঠনিক বা অন্য কোনো প্রোগ্রাম থাকা ঠিক নয়। এতে শববেদারির পরিবেশ নষ্ট হয়। শববেদারিতে নিম্নোক্ত কর্মসূচি থাকতে পারে :

### কর্মসূচি

- |                        |         |
|------------------------|---------|
| ● উদ্বোধন—             | ৫ মিনিট |
| ● দারসে কুরআন/হাদিস—   | ১ ঘণ্টা |
| ● বিশ্রাম—             | ২ ঘণ্টা |
| ● ব্যক্তিগত নফল এবাদত— | ১ ঘণ্টা |
| ● শেষ রাতে ১টি আলোচনা— | ১ ঘণ্টা |
| ● সমাপনী/মুনাযাত—      | ১ ঘণ্টা |

### জ. সামষ্টিক ভোজ

মাঝে মাঝে কর্মীদের পারস্পরিক সম্পর্ক গভীর থেকে গভীরতর করার জন্য সামষ্টিক খাওয়ার ব্যবস্থা করা যেতে পারে। এতে প্রত্যেক কর্মী নিজের খাওয়া এক জায়গায় নিয়ে আসবে অথবা নির্দিষ্ট পরিমাণ আর্থিক সহযোগিতা দিয়ে খাদ্য প্রস্তুত করবে এবং সকলে মিলে একত্রে বসে খাবে। খাওয়ার আগে বা পরে বক্তৃতা বা আলোচনা চলবে। এ প্রোগ্রামে যথেষ্ট আনন্দ ও শিক্ষণীয় বিষয়

আছে এবং এর মাধ্যমে ‘বুনইয়ানুম মারসুস’ (সীসাঢালা প্রাচীর)-এর ন্যায় পারস্পরিক ভ্রাতৃত্ববোধ সৃষ্টি হবে।

### ঝ. ব্যক্তিগত রিপোর্ট সংরক্ষণ

সংগঠনের প্রত্যেক জনশক্তিকে বৈঠকে ব্যক্তিগত রিপোর্ট পেশ করতে হয়। এ রিপোর্ট কর্মী তৈরির গুরুত্বপূর্ণ হাতিয়ার। যে কর্মীর রিপোর্ট যত উন্নত, সে তত উন্নত কর্মী। রিপোর্ট কর্মীদের যোগ্যতা বাড়ায়, নিজের দুর্বলতা প্রকাশ করে। রিপোর্ট হচ্ছে আয়না যা জীবনের ত্রুটিপূর্ণ দিকগুলো প্রত্যেকের সামনে তুলে ধরে। প্রত্যেক কর্মীকে ব্যক্তিগত রিপোর্ট সংরক্ষণ করতে হয় তবে পরিস্থিতি ও পরিবেশ অনুযায়ী সংরক্ষণের পদ্ধতি পরিবর্তিত হয়। মাঝে মাঝে পূর্বের রিপোর্টের সঙ্গে বর্তমান রিপোর্ট তুলনা করে দেখতে হয়। এতে উন্নতি, অবনতি বা স্থবিরতা ধরা পড়ে। রিপোর্ট শুধু সংরক্ষণ করলে চলে না। নির্ধারিত পদ্ধতি অনুযায়ী সভাপতিকে দেখাতে হয়। সভাপতি রিপোর্টের ওপর মন্তব্য এবং প্রয়োজনীয় পরামর্শ দেবেন। তবে কর্মীসভায় সভাপতি ব্যক্তি বিশেষের ওপর মন্তব্য না করে সাধারণ মন্তব্য পেশ করেন। ইসলামী আন্দোলনের আদর্শ কর্মী হওয়ার জন্য ব্যক্তিগত রিপোর্ট সংরক্ষণ ও দেখান অতি প্রয়োজনীয়।

### ব্যক্তিগত রিপোর্টের ব্যাখ্যা

নিম্নে ব্যক্তিগত রিপোর্টের বিষয়সমূহের সংক্ষিপ্ত ব্যাখ্যা পেশ করা হলো—

#### কুরআন অধ্যয়ন

ইসলামী জ্ঞানের মূল উৎস হলো আল-কুরআন। তাই দৈনন্দিন জীবনে ইসলামী বিধান মেনে চলার জন্য পবিত্র কুরআনের সাথে গভীর সম্পর্ক স্থাপন অপরিহার্য। ইসলামী আন্দোলনের কর্মীদের প্রত্যক্ষভাবে কুরআনের আলোকে জীবন যাপনে অভ্যস্ত করে তোলার উদ্দেশ্যেই নিয়মিত কুরআন অধ্যয়নের প্রতি উৎসাহিত করা হয়। এর লক্ষ্য হলো আল-কুরআনের মূর্ত প্রতীকরূপে নিজের জীবনকে গড়ে তোলার মাধ্যম আল্লাহর মনোনীত ও অমনোনীত কাজ সম্পর্কে অবহিত হয়ে থাকা। সুতরাং কুরআন অধ্যয়ন দ্বারা আল্লাহর পছন্দনীয় ও অপছন্দনীয় কাজের তালিকা প্ৰস্তুত করে নিয়ে তাঁর পছন্দনীয় কাজে আত্মনিয়োগ এবং অপছন্দনীয় কাজ বর্জন করে চলতে হবে। প্রত্যহ সকালে ফজরের নামাজের পরের সময়টা কুরআন অধ্যয়নের সর্বোত্তম সময়। তাছাড়া নিয়মতান্ত্রিকতা ও ধারাবাহিকতার প্রতিও লক্ষ রাখা প্রয়োজন।

#### হাদিস অধ্যয়ন

হাদিস ইসলামী জ্ঞানের দ্বিতীয় উৎস। কুরআনকে বুঝতে হলে হাদিস অধ্যয়ন অপরিহার্য। কারণ, কুরআনের ব্যাখ্যাই হচ্ছে হাদিস। তাই প্রত্যহ কুরআন



অধ্যয়নের সাথে সাথে হাদিস অধ্যয়নের দিকেও নজর দেওয়া প্রয়োজন। হাদিস অধ্যয়নের সময় পঠিত হাদিসের সাথে নিজের জীবনকে দেখতে হবে এবং পর্যায়ক্রমে হাদিসের আলোকে নিজের চরিত্রকে গড়ে তোলার চেষ্টা করতে হবে। প্রত্যহ কমপক্ষে দু-তিনটি করে হাদিস নির্দিষ্ট সময়ে অধ্যয়ন করার চেষ্টা করা উচিত।

### ইসলামী সাহিত্য অধ্যয়ন

যেকোনো আদর্শবাদী আন্দোলনের কর্মীদের স্বীয় আদর্শের জ্ঞান লাভ করা, আদর্শের প্রতি অটুট বিশ্বাস স্থাপন করা ও আদর্শমুখিক চরিত্র গঠন করা একান্তই অপরিহার্য। ইসলামী আন্দোলনের যোগ্য কর্মী হওয়ার জন্য ইসলামী আদর্শের পর্যাপ্ত জ্ঞানের সাথে সাথে সমকালীন বিশ্বের যাবতীয় মতাদর্শ সম্পর্কেও পূর্ণভাবে 'ওয়াকিফহাল' হওয়া প্রয়োজন। ইসলাম ও অনৈসলামের মৌলিক পার্থক্য এবং ইসলামী আদর্শের শাস্তরূপ সম্পর্কে সুস্পষ্ট ধারণা লাভ না করে এ আন্দোলনে টিকে থাকা সম্ভব নয়। এক্ষেত্রে কেবল গৎবাঁধা কতগুলো মুখস্থ বুলি শিখে নেওয়া যথেষ্ট নয়; বরং গভীর অধ্যয়ন ও অনুশীলনের মাধ্যমে নিজের মধ্যে চিন্তার মৌলিকত্ব সৃষ্টি করা অপরিহার্য। নিয়মতান্ত্রিকতা লক্ষ্য করে অধ্যয়ন করাই এর অন্যতম সহায়ক।

### পাঠ্যপুস্তক অধ্যয়ন ও ক্লাসে উপস্থিতি

আন্দোলনের দাবি অনুযায়ী ভালো ছাত্র এবং ভালো মুসলিমরূপে গড়ে উঠাই আমাদের মৌলিক কাজ। ছাত্রত্বকে বাদ দিয়ে ইসলামী ছাত্রশিবিরকে কল্পনাও করা যায় না। সুতরাং শিবির কর্মীদের নিয়মিত ক্লাসে যোগদান এবং পাঠ্যপুস্তক অধ্যয়নে অধিক তৎপর হতে হবে এবং এটাকে আন্দোলনেরই একটা অপরিহার্য কাজ মনে করতে হবে। অন্যান্য কাজের ন্যায় পাঠ্যপুস্তক অধ্যয়নের ক্ষেত্রে শিবির নিয়মতান্ত্রিকতার ওপর সর্বাধিক গুরুত্ব আরোপ করে থাকে। যারা নিজের দোষে বা অমনোযোগিতার কারণে ক্লাসের পড়া লেখার প্রতি ক্ষতি সাধন করে তারা প্রকায়ান্তরে শিবিরেরই ক্ষতি করে। যারা ব্যক্তিগত পড়াশুনা, পাঠ্যপুস্তক অধ্যয়ন ও সাংগঠনিক দায়িত্ব পালনে ভারসাম্য রক্ষা করে চলে তারাই শিবিরের দৃষ্টিতে আদর্শ কর্মী

### জামায়াতে নামাজ আদায়

আল্লাহর দাসত্ব ও আনুগত্যের পরাকাষ্ঠা প্রদর্শিত হয় নামাজের মাধ্যমে আল্লাহর সাথে গভীর সম্পর্ক স্থাপনের এটাই সর্বোত্তম উপায়। জামায়াতে নামাজ আদায়কেই ইকামাতে সালাত বলা হয়েছে। মুমিনের জীবনকে সুশৃঙ্খলভাবে

গড়ে তোলার এ এক উৎকৃষ্ট পন্থা। যার নামাজ যত উন্নত আল্লাহর কাছে সে ততই মর্যাদাসম্পন্ন। বস্ত্রত নামাজ ধাপে ধাপে বান্দাকে আল্লাহর সান্নিধ্যে পৌঁছে দেয় বলেই বলা হয়েছে- ‘আসসালাতু মেরাজুল মুমিনিন’ ক্রমান্বয়ে এই নামাজকে উন্নত করার উদ্দেশ্যে একে রিপোর্টের অন্তর্ভুক্ত করা হয়েছে। জামায়াতে নামাজ আদায়ের মাধ্যমে বাহ্যিক ও আভ্যন্তরীণ দিককে সর্বাঙ্গীণ সুন্দর করে তোলা এর মূল লক্ষ্য।

### কর্মী যোগাযোগ

আন্তরিক পরিবেশে পারস্পরিক আলাপ-আলোচনার মাধ্যমে একে অপরকে আন্দোলনের কাজে উৎসাহিত করা, একে অপরের সমস্যা সমাধানের চেষ্টা করা, পারস্পরিক পরামর্শ ও সমালোচনার মাধ্যমে ব্যক্তি গঠন ও সংগঠনের সামগ্রিক উন্নতি বিধানের তৎপর হওয়াই এর প্রধান লক্ষ্য। বিশুদ্ধ নিয়ত এবং স্বচ্ছ আন্তরিকতা ছাড়া এটি ফলপ্রসূ হতে পারে না। কর্মী যোগাযোগ পরিকল্পনাবিহীন অথবা উদ্দেশ্যহীন সাক্ষাতের নাম নয়।

প্রত্যেক শাখার প্রতিটি কর্মীকে একটা টার্গেট তৈরি করে কর্মী যোগাযোগ করতে হয়। অনগ্রসর কর্মীর সাথে নিয়মিত যোগাযোগ করে তাকে হেকমতের সাথে অগ্রসর করা এবং অগ্রসর কর্মীর সাথে যোগাযোগের মাধ্যমে নিজেদের তার মানে উন্নীত করার প্রচেষ্টা চালানোই কর্মী যোগাযোগের মুখ্য উদ্দেশ্য। এ অনুভূতি নিয়ে যেখানে কর্মী যোগাযোগ হয় না সেখানে কর্মীদের মধ্যে চিন্তার ঐক্য স্থাপিত হতে পারে না, পারস্পরিক সম্পর্ক সুন্দর হতে পারে না এবং সংগঠন কখনো হতে পারে না গতিশীল। এক্ষেত্রে একটা বিষয় অবশ্যই লক্ষ রাখতে হবে যে, কর্মী যোগাযোগ কোনো কর্মীর দোষ অনুসন্ধানের জন্য নয়, তার সংশোধনের জন্যই করা হয়। এজন্য যার সাথে আপনি যোগাযোগ করবেন তার ছিদ্রাশ্বেষণ না করে তার গুণগুলোকে সঠিকভাবে কাজে লাগানোর পরামর্শ দিন এবং তার মধ্যে যে সকল দোষত্রুটি রয়েছে সেগুলো দূর করার জন্য তার সামনে আপনার নিজের চরিত্র, কর্মজীবন, আচার-আচরণ ইত্যাদিকে বাস্তব আদর্শ হিসেবে তুলে ধরুন।

### বন্ধু, সমর্থক যোগাযোগ ও বই বিতরণ

আমাদেরকে কুরআনে বর্ণিত হেকমত অনুযায়ী দাওয়াতি কাজ আঞ্জাম দিতে হবে এবং এ উদ্দেশ্যেই বন্ধু ও সমর্থক যোগাযোগ করতে হয়। কারও সাথে শিবির সম্পর্কে দু-চার মিনিট আলাপ করলেই দাওয়াত পৌঁছানো হয় না; বরং কমপক্ষে তিন/চার জন বন্ধু ঠিক করে প্রতি সপ্তাহে তাদের সাথে নিয়মিত যোগাযোগ করা দরকার, যাতে করে একজন বন্ধু সমর্থকে উন্নীত হতে পারে।

এখানেও বিশুদ্ধ নিয়ত এবং অকৃত্রিম আন্তরিকতা আবশ্যিক। মনে রাখবেন কৃত্রিমতা, অভিনয়সূচক আচরণ বা সাময়িক লোভ-লালসার মাধ্যমে কাউকে কোনোদিন ইসলামী আন্দোলনের কর্মী করা যায় না। পক্ষান্তরে নিজে ইসলামী চরিত্র সৃষ্টির কাজে আত্মনিয়োগ করে নিছক আল্লাহর জন্য মানুষকে এ পথে আহ্বান জানালে তা ফলপ্রসূ না হয়ে পারে না।

ছাত্রদের মনমগজে পুঞ্জীভূত আবর্জনা পরিষ্কার করে তাদেরকে ইসলামের দিকে আকৃষ্ট করার জন্য পাত্র বুঝে পুস্তক পরিবেশন দাওয়াতি কাজের উত্তম হাতিয়ার। প্রকৃতপক্ষে ইসলামী আন্দোলন বোঝার ক্ষেত্রে প্রধান বাধা হচ্ছে অজ্ঞতা। টাগেটকৃত বন্ধু ও সমর্থকদের বই বিতরণ ও পড়ানো ছাড়া দাওয়াতি কাজ ফলপ্রসূ হতে পারে না। কোনো ব্যক্তিকে বই দেওয়ার আগে তার মনে পড়ার আহ্বাহ সৃষ্টি; পড়ার পর ঠিকমতো বুঝল কি না সে খবর নেওয়া এবং সুযোগমতো আন্দোলনের দিকে টেনে আনাই আমাদের কাজ।

### সাংগঠনিক দায়িত্ব পালন

ওপরে বর্ণিত কাজগুলো ইসলামী আন্দোলনের প্রত্যেক কর্মীকে নিজের এবং অন্যের জীবন গঠনের জন্য অবশ্যই করতে হয়। সাথে সাথে প্রত্যেক কর্মীকে সাংগঠনিক দায়িত্ব পালন করতে হয় এবং তার জন্য নিয়মিত কিছু সময় ব্যয় করতে হয়। প্রত্যেক জেলা, শাখা ও উপশাখা সভাপতির সাংগঠনিক দায়িত্বের মধ্যে রয়েছে সভাসমূহ পরিচালনা, পরিকল্পনা তৈরি, কর্ম বন্টন ও কর্মী পরিচালনা, বিভিন্ন বিভাগের কাজের তদারকি, ব্যক্তিগত প্রচেষ্টার মাধ্যমে কর্মীদের এগিয়ে আনা, কর্মীদের ব্যক্তিগত রিপোর্ট দেখা এবং উর্ধ্বতন সংগঠনের সাথে যোগাযোগ রক্ষা করা।

### দাওয়াতি কাজ

উল্লেখ্য বন্ধু, সমর্থক, মেধাবী ছাত্র ও শুভাকাঙ্ক্ষী যোগাযোগ দাওয়াতি কাজের অংশ। এছাড়াও প্রত্যেক কর্মীর দাওয়াতি কাজ, কর্মী যোগাযোগ এবং সাংগঠনিক অনুষ্ঠানে যোগদান এবং সংগঠন কর্তৃক দৈনন্দিন যেসব দায়িত্ব অর্পিত হয় সেগুলোও সাংগঠনিক দায়িত্বের অন্তর্ভুক্ত। সপ্তাহের প্রতি সোমবারকে দাওয়াতি বার হিসেবে কাজে লাগানো প্রয়োজন।

### পত্র-পত্রিকা পাঠ

চলমান বিশ্বের খবরাখবর রাখার জন্য বিভিন্ন পত্র-পত্রিকা এবং সাময়িকীর সাথে সম্পর্ক রাখা অপরিহার্য। একজন ছাত্র হিসেবে, সচেতন নাগরিক হিসেবে সর্বোপরি একটি প্রাণবন্ত আন্দোলনের কর্মী হিসেবে পত্র-পত্রিকার সাথে

ওয়াকিফহাল হওয়াই যথেষ্ট নয়; বরং এ সম্পর্কে নিজস্ব মতামত ব্যক্ত করার মতো যোগ্যতা অর্জনও অত্যাবশ্যিক।

## শরীরচর্চা

সুস্থ দেহ ও সুন্দর মন ছাড়া একজন মানুষের স্বাভাবিক বিকাশ ঘটতে পারে না। এজন্য নিয়মিত শরীরচর্চা আবশ্যিক।

## আত্মসমালোচনা

আত্মসমালোচনা বলতে নিজ নিজ কাজের সামগ্রিক খতিয়ান নেওয়াকেই বোঝায়। বস্তুত কোনো ব্যক্তি নিয়মিত নিজস্ব কাজের খতিয়ান নিলে তার জীবন ক্রমাগত উন্নত না হয়ে পারে না। বিশেষ করে যারা আল্লাহকে হাজির নাজির জেনে নিজ নিজ কাজের পর্যালোচনা করে তারা দ্বীনি দায়িত্ব পালনে কোনো অবস্থাতেই শৈথিল্য দেখাতে পারে না। আখেরাতের সাফল্য যাদের একমাত্র কাম্য, আল্লাহর সন্তুষ্টির আশা এবং অসন্তোষের ভীতির মাঝ পথে যারা দণ্ডায়মান, তাদের জীবনে আত্মসমালোচনার জন্য নির্দিষ্ট সময় ঠিক করে নেওয়া ভালো। আত্মসমালোচনার সময় নিজের মনে এ অনুভূতি সৃষ্টি করতে হবে যেন রোজ কিয়ামতে পরম পরাক্রমশালী হাকিমের সামনে নিজের আমলের পর্যালোচনা করা হচ্ছে।

## এ. দুআ ও নফল ইবাদত

বাতিলের সয়লাবে ইসলামী আন্দোলনের কর্মী হিসেবে মান রক্ষা করা দুর্কহ কাজ। মান ঠিক রাখার জন্য কর্মীদের অব্যাহতভাবে প্রচেষ্টা চালিয়ে যেতে হয়। ফরজ, ওয়াজিবসমূহ আদায় করে দু-একটা ভালো কাজ সম্পন্ন করা এ ক্ষেত্রে যথেষ্ট নয়। আল্লাহর পছন্দনীয় কাজে সব সময় জড়িত থেকেই এটা করা যেতে পারে। অর্থাৎ এজন্য প্রয়োজন নফল ইবাদতের। নফল ইবাদতের ভেতর সর্বোৎকৃষ্ট হচ্ছে নফল নামাজ। নফল নামাজের ভেতর তাহাজ্জুদের গুরুত্ব সর্বাধিক। মাঝে মাঝে ব্যক্তিগতভাবে রাতে জেগে কর্মীরা তাহাজ্জুদ নামাজ আদায় করতে পারেন। ইসলামী আন্দোলনের কর্মীদের জন্য তাহাজ্জুদ নামাজের গুরুত্ব এবং প্রয়োজনীয়তা অপরিসীম। আমাদের নেতা রাসূলে মকবুল (সা.) নামাজের গুরুত্ব বিভিন্নভাবে প্রকাশ করেছেন। অন্যান্য ওয়াক্ফের নামাজের সময়ে যে নফল নামাজ প্রচলিত রয়েছে সেদিকেও কর্মীদের মনোযোগ দেওয়া উচিত। এরপরেই রয়েছে নফল রোজার গুরুত্ব। আমরা যুবক। এ বয়সে চুপ করে বসে থাকা যায় না। ভালো কাজ না পেলে খারাপ কাজে আত্মনিয়োগ করাটাই স্বাভাবিক। এ বয়সে দৈহিক চাহিদাও বেশি। এগুলো যদি নিয়ন্ত্রণ

করা না যায় তাহলে বিপর্যয় অনিবার্য। নফল রোজা কর্মীদের এক্ষেত্রে সাহায্য করবে। এ কারণে রাসূলুল্লাহ (সা.) যুবকদের প্রতি মাসে দুটি করে রোজা রাখার উপদেশ দিয়েছেন। রোজা একদিকে যেমন দৈহিক চাহিদা নিয়ন্ত্রিত ও স্তিমিত করে অপরদিকে তেমনি আত্মাকেও পবিত্র করে তোলে। আল্লাহর নিয়ামতের শোকর করা, প্রতিটি কাজের শুরু ও শেষে নির্ধারিত দুআ করা, সফরে, বিশ্রামে, পারস্পরিক দেখা সাক্ষাতে, ওজুতে, জায়নামাজে, সুখে-দুঃখে রাসূলুল্লাহ (সা.) যে সমস্ত দুআ পড়তে বলেছেন, সেগুলো অভ্যাস করার প্রচেষ্টা চালানো উচিত। দুআ অস্থিরতা ও দুশ্চিন্তা দূর করে, হৃদয়ে এনে দেয় প্রশান্তি।

### ট. ইহতেসাব বা গঠনমূলক সমালোচনা

ইসলামী আন্দোলনের এক কর্মী অপর কর্মীর আয়নাস্বরূপ। তাই প্রত্যেক কর্মীকে অপর কর্মীর ত্রুটি-বিচ্যুতি সংশোধন এবং দুর্বলতা থেকে হেফাজত করার চেষ্টা করতে হবে। ত্রুটি-বিচ্যুতি দূর করার উপায় হচ্ছে সংশ্লিষ্ট কর্মীর সাথে ব্যক্তিগতভাবে দেখা করতে হবে এবং তার দুর্বলতাগুলোকে জানিয়ে দিতে হবে। কারও দোষ দেখানো বড়ো কঠিন কাজ। এজন্য সময়, মেজাজ, মনোভাব ইত্যাদি বিবেচনা করে নেহায়েত একজন শুভাকাঙ্ক্ষী হিসেবে তার দোষ-ত্রুটি তাকে জানাতে হবে। ব্যক্তিগতভাবে প্রচেষ্টা চালানোর পর সংশোধন না হলে কর্মী, সাথী বা সদস্য বৈঠকে এহতেসাবের সময় তা তুলে ধরতে হবে। মনে রাখতে হবে সমালোচনা গঠনমূলক হতে হবে। কাউকে হেয়প্রতিপন্ন করা অথবা কারও ত্রুটি শুধু শুধু তাল্লাশ করা শুভ লক্ষণ নয়। যার দোষ তুলে ধরা হবে তার কর্তব্য হচ্ছে ত্রুটির স্বীকৃতি দেওয়া, সংশোধনের জন্য দুআ কামনা করা এবং প্রচেষ্টা চালানো। কোনো কর্মীর ত্রুটি না থাকা সত্ত্বেও কারও মনে ভুল ধারণা থাকতে পারে, তাই সংশ্লিষ্ট কর্মী যখন কারণ দর্শাবেন বা বুঝিয়ে দেবেন তখন তা ঐকান্তিকতার সাথে মেনে নেওয়া ও ভুল ধারণা অন্তর থেকে মুছে ফেলা কর্তব্য। আমাদের পারস্পরিক সম্পর্ক হচ্ছে ভালোবাসার সম্পর্ক। ভালোবাসার বা ভ্রাতৃত্ববোধ গড়ে ওঠা সম্পর্কে ‘ভীতি’ প্রশয় পেতে পারে না। ইহতেসাব যখন স্তিমিত হয়ে যাবে, তখন গোটা আন্দোলন তার গতিশীলতা হারিয়ে ফেলবে। সম্পর্কের ক্ষেত্রে একটা কৃত্রিমতা আসবে। পারস্পরিক আস্থা ও বিশ্বাস কমে যাবে। অতএব মেজাজ ও নিয়ম-নীতি অনুযায়ী এটা চালু রাখা অত্যন্ত জরুরি।

### ঠ. আত্মসমালোচনা

একজন কর্মীর জীবনকে গতিশীল রাখার জন্য আত্মসমালোচনা বা আত্মবিশ্লেষণ অপরিহার্য। এর চর্চা হতে থাকলে মনে অহংকার সৃষ্টি হতে পারে না। কোনো কাজ করার পর প্রদর্শনেচ্ছা জন্মাতে পারে না। জীবন থেকে ত্রুটি

বিচ্যুতি ক্রমান্বয়ে দূর হতে থাকে। তাই হজরত ওমর ফারুক (রা) যথার্থই বলেছেন ‘আল্লাহর কাছে হিসাব দেওয়ার আগে নিজেই নিজের হিসেব নাও।’ আত্মসমালোচনার সময় ভুলের জন্য তওবা করতে হয়। তওবা ব্যতিরেকে আত্মসমালোচনার ফল পাওয়া যায় না। আত্মসমালোচনার যেরূপ নির্দিষ্ট নিয়ম রয়েছে তদ্রূপ তওবার জন্যও নিয়ম রয়েছে। তাই প্রথমে তওবার নিয়মাবলি উল্লেখ করা হচ্ছে।

### তওবার নিয়ম

- সর্বপ্রথম ঐকান্তিকতার সাথে নিজ ভুলের স্বীকৃতি দেওয়া। এটা সহজ কাজ নয়। মানুষ বড়ো একটা পাপ করেও তা ‘জাস্টিফাই’ করতে চায়।
- ভুলের জন্য আল্লাহর কাছে মাফ চাওয়া।
- দ্বিতীয়বার ভুল না করার জন্য ওয়াদা করা এবং ওয়াদাকে কার্যকর করার বাস্তব চিন্তা করা।
- নামাজ, রোজা বা আর্থিক কুরবানির বিনিময়ে ভুলের কাফফারা আদায় করা।

এখানে উল্লেখযোগ্য যে, একবার তওবা করার পর তা ইচ্ছাকৃতভাবে ভঙ্গ করলে কাফফারা আদায় করা ওয়াজিব হয়ে যায়। আর ওপরে যে কাফফারার কথা উল্লেখ করা হয়েছে তা তওবার পূর্ণতার জন্য।

### আত্মসমালোচনার পদ্ধতি

সময় নির্বাচন : আত্ম-সমালোচনা করার ভালো সময় হচ্ছে শোয়ার পূর্বমুহূর্ত। এর চেয়ে ভালো সময় হচ্ছে ফজর নামাজের পর। সবচেয়ে ভালো সময় এশার নামাজের পর।

- প্রথম পর্যায়ে আল্লাহকে হাজির-নাজির জেনে জায়নামাজে বসুন। মনে এ চিন্তার উদ্রেক করুন যে আল্লাহ আপনাকে দেখছেন। আপনি সেই রাব্বুল আলামিনের সামনে বসে আছেন; যিনি আপনাকে সৃষ্টি করেছেন। তাঁর হাতেই আপনার জীবন ও মৃত্যু। তিনি রহমান, রহিম ও কাহহার। আপনার অন্তরের নিভৃত কোণের খবরও তিনি রাখেন। মস্তিষ্ক দিয়ে আপনি কী চিন্তা করেছেন তা তিনি ভালোভাবে জানেন। তিনি ইনসাফগার। আপনার ওপর তিনি কখনো জুলুম করেন না।
- দ্বিতীয় পর্যায়ে আপনি আপনার সারাদিনের কর্মব্যস্ততা স্মরণ করুন। আপনি যে সমস্ত ভালো কাজ করেছেন তার জন্য শুকরিয়া আদায় এবং যে ভুল করেছেন তার জন্য তওবা করুন।

- তৃতীয় পর্যায়ে আজকে আপনি যে সব ফরজ, ওয়াজিব আদায় করেছেন তা চিন্তা করুন। এসব আদায়ের কালে আপনার আন্তরিকতা এবং মনোযোগ যথার্থই ছিল কিনা ভেবে দেখুন।
- চতুর্থ পর্যায়ে আপনি আপনার আজকের সাংগঠনিক কাজ নিয়ে চিন্তা করুন। যে দায়িত্ব আপনার ওপর ছিল তা কি পালন করেছেন? এজন্য আপনার সময় ও সামর্থ্য যা ছিল আপনি কি তা পুরোপুরি ব্যয় করেছেন?
- পঞ্চম পর্যায়ে আপনি আপনার আজকের ব্যবহারিক জীবন (মুয়ামেলাত) সম্পর্কে চিন্তা করুন।

শেষ পর্যায়ে আল্লাহর কাছে সাহায্য প্রার্থনা করুন। ইনশাআল্লাহ এভাবে আত্মসমালোচনা করলে কর্মীদের মান বৃদ্ধি পাবে এবং তাদের জীবন পূত-পবিত্র হয়ে উঠবে।

#### ড. কুরআন তালিম/কুরআন ক্লাস

জনশক্তিকে সহিহ কুরআন তিলাওয়াত শিক্ষা দেওয়ার উদ্দেশ্যে 'কুরআন তালিম' এবং কুরআনের বিষয়ে গভীর জ্ঞানার্জনের জন্য 'কুরআন ক্লাস' পরিচালনা করা প্রয়োজন। তবে কুরআন ক্লাস পরিচালনার জন্য পরিচালক পূর্বেই নির্ধারণ করা প্রয়োজন। 'কুরআন তালিম ৪৫ মিনিট এবং কুরআন ক্লাস ১.৩০ মি. থেকে ২ ঘণ্টা স্থায়ী হতে পারে।

#### কর্মসূচি : কুরআন তালিম

উদ্বোধন-	৫ মিনিট
সহিহ তিলাওয়াত প্রশিক্ষণ-	৩০ মিনিট
সমাপনী-	১০ মিনিট

#### কর্মসূচি : কুরআন ক্লাস

উদ্বোধন-	৫ মিনিট
উপস্থিতি পর্যালোচনা-	৫ মিনিট
নির্বাচিত আয়াতের ওপর ক্লাস পরিচালনা-	১৫ মিনিট
প্রশ্নোত্তর-	১০ মিনিট
সমাপনী-	৫ মিনিট

## চতুর্থ দফা কর্মসূচি

### ইসলামী শিক্ষা আন্দোলন ও ছাত্র সমস্যা সমাধান

‘আদর্শ নাগরিক তৈরির উদ্দেশ্যে ইসলামী মূল্যবোধের ভিত্তিতে শিক্ষাব্যবস্থার পরিবর্তন সাধনের দাবিতে সংগ্রাম এবং ছাত্রসমাজের প্রকৃত সমস্যা সমাধানের সংগ্রামে নেতৃত্ব প্রদান।’

এ দফার দুটি দিক রয়েছে :

- ক. ইসলামী শিক্ষাব্যবস্থা প্রতিষ্ঠার সংগ্রাম এবং
- খ. ছাত্রসমাজের প্রকৃত সমস্যা সমাধানের সংগ্রামে নেতৃত্ব প্রদান

নিম্নে এ দুটি কাজের বিভিন্ন দিক উল্লেখ করা হলো :

#### ক. ইসলামী শিক্ষাব্যবস্থা প্রতিষ্ঠার সংগ্রাম

আমাদের বর্তমান সমাজব্যবস্থা পঙ্কিলতায় নিমজ্জিত। তাই এ সমাজে ইসলামী শিক্ষাব্যবস্থা প্রবর্তনের কাজ রাতারাতি হওয়া সম্ভব নয়। এ কাজ ক্রমান্বয়ে হতে হবে। এ আন্দোলন ধারাবাহিকতার সাথে কীভাবে ক্রমান্বয়ে চূড়ান্ত পর্যায়ে নিতে হবে তা নিম্নে বর্ণিত হলো :

আমাদের কর্মীদের নিম্নোক্ত বিষয়ে জেনে নিতে হবে

- প্রথমত : জেনে নিতে হবে, (ক) ইসলামী শিক্ষাব্যবস্থা বলতে কী বোঝায়। (খ) ইসলামী শিক্ষাব্যবস্থার বৈশিষ্ট্য কী কী (গ) ইসলামী শিক্ষাব্যবস্থা কীভাবে প্রবর্তন করা যায় (ঘ) বর্তমান শিক্ষাব্যবস্থার দোষ-ত্রুটি কী কী (ঙ) এর সুদূরপ্রসারী ফল কী (চ) বর্তমান শিক্ষাব্যবস্থার মৌলিক গলদ কোথায় ইত্যাদি। এজন্য আমাদের প্রকাশিত ও অন্যান্য ইসলামী চিন্তাবিদদের বইগুলো পাঠ করতে হবে।
- দ্বিতীয়ত : আমাদেরকে ইসলামী শিক্ষাব্যবস্থা সম্পর্কে জনমত সংগ্রহ করতে হবে। অর্থাৎ ছাত্রসমাজ, বুদ্ধিজীবী, শিক্ষক ও চিন্তাশীল নাগরিকদের বর্তমান শিক্ষাব্যবস্থার কুফল অবগত করিয়ে ইসলামী শিক্ষাব্যবস্থা প্রবর্তনের প্রয়োজনীয়তা বোঝাতে হবে। এজন্য ব্যক্তিগতভাবে যোগাযোগ করে আলোচনা, পুস্তক সাময়িকী, বিজ্ঞপ্তি ইত্যাদি বিতরণ করতে হবে। এছাড়া গ্রুপ মিটিং, সিম্পোজিয়াম, সেমিনার ইত্যাদির অবস্থা বুঝে আয়োজন করা যেতে পারে।
- তৃতীয়ত : অনুকূল পরিবেশ ও পারিপার্শ্বিকতায় দু’মাসে বা প্রতি মাসে শিক্ষাব্যবস্থা সম্পর্কে পোস্টারিং, পত্রিকায় বিবৃতি, পত্রিকার চিঠিপত্র কলামে লেখা, অনলাইন ক্যাম্পিং, ইসলামী শিক্ষাব্যবস্থার দাবিতে দিবস



ও সপ্তাহ পালন প্রভৃতি কাজ করা যেতে পারে। বিভিন্ন সভা-সমিতিতে প্রস্তাব পাস করিয়ে পত্রিকায় দিতে হবে। প্রত্যক্ষভাবে সম্ভব না হলে পরোক্ষভাবেও কাজ করা যেতে পারে।

- **চতুর্থত :** আমাদের বিশিষ্ট ইসলামী চিন্তাবিদদের নিকট আবেদন করতে হবে শিক্ষাব্যবস্থা ইসলামীকরণের পরিকল্পনা পেশ করার জন্য। ইসলামী মনোভাবাপন্ন শিক্ষাবিদদেরও আহ্বান করতে হবে, প্রবন্ধ, নিবন্ধ, বই ইত্যাদির মাধ্যমে ইসলামী শিক্ষাব্যবস্থার রূপ ছাত্রসমাজ ও বুদ্ধিজীবীদের সামনে তুলে ধরার জন্য।
- **পঞ্চমত :** আমাদের কর্মীদের লিখিত প্রবন্ধ, গল্প, কবিতা সহকারে শিক্ষাব্যবস্থার ওপর বিশেষ সংকলন বের করার চেষ্টা করতে হবে। সংকলন বের করার পূর্বে কেন্দ্রীয় সভাপতির অনুমতি নিতে হবে।

মনে রাখতে হবে, শিক্ষাব্যবস্থা পরিবর্তনের মাধ্যমে ইসলামী সমাজব্যবস্থা প্রতিষ্ঠা সম্ভব। তাই এ কাজ অত্যন্ত গুরুত্বপূর্ণ। কিন্তু শিক্ষাব্যবস্থার পরিবর্তনই আমাদের আসল উদ্দেশ্য নয়; বরং উদ্দেশ্যে পৌঁছার হাতিয়ার মাত্র। আমাদের চিরস্থায়ী উদ্দেশ্য আল্লাহর সন্তোষ অর্জন।

#### খ. ছাত্রসমাজের প্রকৃত সমস্যা সমাধানের সংগ্রামে নেতৃত্ব প্রদান

অর্থাৎ ছাত্রদের যুক্তিসঙ্গত দাবি-দাওয়া পূরণের জন্য আশ্রয় চেষ্টা করা ও তাদের অভাব-অভিযোগ দূরীকরণে এগিয়ে আসা। এক্ষেত্রে বলিষ্ঠ ও অগ্রণী ভূমিকা পালন করা।

একটি দায়িত্বশীল ছাত্রসংগঠন হিসেবে ছাত্রদের সমস্যা সমাধানকেই আমরা অগ্রাধিকার দিয়ে থাকি। ছাত্র বলেই ছাত্র সমস্যার ব্যাপারে আমরা অমনোযোগী থাকতে পারি না। ছাত্রদের যাবতীয় ন্যায়সঙ্গত সমস্যা সমাধানে আমাদের অগ্রণী হতে হবে। সমস্যা সমাধানের আমাদের মনে রাখতে হবে যে, আমরা সমস্যার স্থায়ী সমাধান চাই। এক সমস্যার সমাধান করতে গিয়ে আরও দশটি সমস্যার সৃষ্টি করা আমাদের কাজ নয়। আমরা নিয়মতান্ত্রিক কর্মসূচির মাধ্যমে গঠনমূলক প্রচেষ্টার পরিবর্তে ধ্বংসাত্মক কোনো পন্থা অবলম্বনে বিশ্বাসী নই।

আমরা ছাত্র সমস্যাকে দুভাবে ভাগ করতে পারি

#### ১) ব্যক্তিগত ২) সমষ্টিগত

(১) **ব্যক্তিগত সমস্যা :** ব্যক্তিগত সমস্যার যেগুলো বেশির ভাগ অর্থনৈতিক, সেগুলো সমাধানের জন্য স্বাবলম্বন পন্থা অনুসরণ করি। অর্থাৎ নিজেরাই এসব সমস্যার সমাধান করতে চেষ্টা করি। ছাত্রদের লজিং না থাকা, বেতন দানে ও পরীক্ষার ফি দিতে অক্ষমতা, বই কেনার অসামর্থ্য ইত্যাদি দূরীকরণার্থে আমরা

আমাদের ছাত্রকল্যাণ বিভাগের মাধ্যমে সামর্থ্য অনুযায়ী নিম্নোক্ত কাজ করে থাকি :

- লজিং জোগাড় করে দেওয়া
- লেভিং লাইব্রেরি প্রতিষ্ঠা করা
- ফ্রি-কোচিং ক্লাস চালু করা
- ভর্তি সহায়িকা প্রকাশ
- বিনামূল্যে প্রশ্নপত্র বিলি
- স্টাইপেন্ড চালু করা

### লেভিং লাইব্রেরি

গরিব ছাত্রদেরকে বিনামূল্যে পাঠ্যবই সরবরাহ করার জন্যই লেভিং লাইব্রেরির প্রতিষ্ঠা করা হয়। আমাদের কর্মীদের মাঝে যারা বিভিন্ন ফাইনাল পরীক্ষায় পাস করেন, তারা তাদের পাঠ্যবই শিবিরের লেভিং লাইব্রেরিতে দান করতে পারেন। শুভাকাঙ্ক্ষীদের দানও আমরা সানন্দে গ্রহণ করে থাকি। এতে অনেক ছাত্রের শিক্ষা লাভের পথ সুগম হয়।

### লেভিং লাইব্রেরি প্রতিষ্ঠার পদ্ধতি

পরীক্ষা শেষ হওয়ার সাথে সাথে কর্মীদের পরীক্ষার্থীদের সাথে যোগাযোগ করে তাদের আমাদের লেভিং লাইব্রেরিতে বিনামূল্যে বই প্রদান করতে উদ্বুদ্ধ করতে হবে। এজন্য পূর্বাঙ্কে একটা বিজ্ঞাপনও পরীক্ষার্থীদের উদ্দেশে দেওয়া যেতে পারে।

এভাবে কর্মীদের দেওয়া বই ও ছাত্রদের থেকে সংগ্রহ করা বই দিয়ে লাইব্রেরি প্রতিষ্ঠা করতে হয়। বই গরিব ও উপযুক্ত ছাত্রদেরকে দিতে হয়। এক মাসের জন্য বই ইস্যু করা হয় এজন্য কার্ড তৈরি করে নিতে হয়। বইয়ের তালিকা ও বিতরণ রেজিস্টার রাখতে হয়। লেভিং লাইব্রেরির জন্য প্রয়োজনীয় নিয়ম-নীতি থাকে। এজন্য পরিচালকের তত্ত্বাবধানে এ লাইব্রেরি পরিচালিত হয়।

এ লাইব্রেরির জন্য বিভিন্ন পুস্তক বিক্রেতা ও প্রকাশকের নিকট থেকেও বই নেওয়া যেতে পারে। এজন্য বিশেষ অভিযান চালানো প্রয়োজন।

### ফ্রি কোচিং/ক্লাস

পরীক্ষার কয়েক মাস পূর্বে বিনা বেতনে কোচিং/ক্লাস করার বন্দোবস্ত করা যেতে পারে। সেজন্য উপযুক্ত ব্যবস্থাদির মাধ্যমে ছাত্রদেরকে কোচিং ক্লাসের খবর জানিয়ে দিতে হবে। কোনো শিক্ষাপ্রতিষ্ঠানে অথবা সুবিধাজনক স্থানে সকালের দিকে অথবা রাতে এ ক্লাসের ব্যবস্থা করতে হয়। শিক্ষাপ্রতিষ্ঠানে কর্তৃপক্ষের সাথে যোগাযোগ করে সেখানে ক্লাস করার অনুমতি নিতে হবে। আমাদের মনোভাবাপন্ন শিক্ষক অথবা মেধাবী কর্মীরা এতে শিক্ষকতা করবেন। ছাত্রদের জন্য অফ, ইংরেজি অথবা জটিল কোনো বিষয়ের কোচিং ক্লাসের ব্যবস্থা করতে হয়।

## ভর্তি সহায়িকা প্রকাশ

বিভিন্ন প্রতিষ্ঠানে ভর্তি উপযোগী সহায়িকা প্রকাশ করা যেতে পারে।

**বিনামূল্যে প্রশ্নপত্র বিলি :** বিগত বছরের পরীক্ষার প্রশ্নপত্র জোগাড় করে ফটোকপি করে অথবা ছেপে ছাত্রদের নিকট অতি কম মূল্যে অথবা বিনামূল্যে বিতরণ করা যেতে পারে। কলা, বাণিজ্য ও বিজ্ঞান প্রভৃতি বিভিন্ন বিভাগের প্রশ্নপত্র পৃথক পৃথক পুস্তিকায় ছাপিয়ে বিক্রি করা যায়। বিশেষ করে মাধ্যমিক ও উচ্চমাধ্যমিক পরীক্ষার প্রশ্নপত্র ছাপিয়ে বিক্রয় করা সহজ। কারণ, এসব শ্রেণিতে ছাত্র বেশি থাকে।

**স্টাইপেন্ড :** জাকাতের টাকা সংগ্রহ ও বিভিন্ন শিক্ষানুরাগী ধনী ব্যবসায়ীদের সাথে যোগাযোগ করে গরিব ছাত্রদের জন্য বৃত্তি বা স্টাইপেন্ডের বন্দোবস্ত করা যেতে পারে। অনেকে আছেন যারা সংগঠনের বায়তুলমালে টাকা দিতে রাজি নন। কিন্তু গরিব ছাত্রদের জন্য টাকা দিতে অগ্রহী, তাদের সাহায্য এ কাজে ব্যবহার করা যেতে পারে।

**কর্জে হাসানা :** নিছক আল্লাহর সম্বলটির আশায় কাউকে বিপদে আর্থিক সাহায্য দেওয়ার জন্য কর্জে হাসানা চালু করা যেতে পারে। এখান থেকে কাউকে কর্জ দিতে হলে লিখিত চুক্তি হয়ে যাওয়া উচিত।

**২. সমষ্টিগত সমস্যা :** ওপরে ছাত্রদের ব্যক্তিগত সমস্যার উল্লেখ করা হয়েছে। এ ছাড়াও ছাত্রদের অনেক সমস্যা রয়েছে যা সমষ্টিগত। যেমন ভর্তি ও আসন সমস্যা, শিক্ষকের অভাব, পাঠাগারের অভাব, মসজিদ না থাকা, ক্যান্টিনের সমস্যা, নির্যাতনমূলক ব্যবস্থা, পাঠ্য বইয়ের মূল্য ও বেতন বৃদ্ধি প্রভৃতি। এসব সমস্যা সমাধানের জন্য আন্দোলন প্রয়োজন। আন্দোলনের নামে কোনো স্বার্থান্বেষী মহলের ষড়যন্ত্রে জড়িয়ে পড়াও আমাদের উদ্দেশ্য নয় এজন্য এসব সমস্যা সমাধানে আমাদের কর্মসূচি নিম্নরূপ :

ক. আমরা প্রথমে সমস্যার কারণ নির্ণয় করতে চেষ্টা করব। গোড়ায় গলদ থাকলে শাখা-প্রশাখা নিয়ে হইচই করে লাভ নেই। কারণ নির্ণয়ের পর যথাসম্ভব মানসিক ও বুদ্ধিবৃত্তিক প্রস্তুতি নিয়ে কর্তৃপক্ষের নিকট ডেলিগেট প্রেরণ, স্মারকলিপি প্রদান, পারস্পরিক আলাপ-আলোচনা, স্বাক্ষর অভিযান চালিয়ে কর্তৃপক্ষকে সমস্যা সমাধানের যৌক্তিকতা ও পস্থা বোঝাতে চেষ্টা করব। আমাদের বিশ্বাস, বেশিরভাগ সমস্যাই এভাবে সমাধান করা যায়।

খ. যদি উপরোক্ত উপায়ে সমস্যা সমাধানের কোনো ব্যবস্থা না হয় তাহলে প্রতিবাদ সভা, নিন্দা প্রস্তাব গ্রহণ, পোস্টারিং, পত্রিকায় বিবৃতি প্রদান প্রভৃতি উপায়ে আমরা নিয়মতান্ত্রিক আন্দোলনের সূচনা করব।

গ. উপরোক্ত দু'উপায়ের পরেও যদি কর্তৃপক্ষ অনমনীয় থাকেন, তখন আমরা প্রতীকী ধর্মঘট পালন ও সুশৃঙ্খল আন্দোলনের মাধ্যমে এসব দাবি আদায়ের চেষ্টা করব।

আমরা নিশ্চিত যে, উপরোক্ত তিনটি পর্যায়ে চেষ্টা করলে কোনো সমস্যা সমাধান ছাড়া থাকতে পারে না। যদি না হয় তাহলে বুঝতে হবে কর্তৃপক্ষ গঠনমূলক আলোচনা চান না অথবা সমষ্টির স্বার্থে ব্যক্তি বা কতিপয় লোকের স্বার্থ ত্যাগ করতে নারাজ। এহেন মুহূর্তে অবস্থার দাবি অনুযায়ী আমাদের আরও বলিষ্ঠ পদক্ষেপ গ্রহণ করতে হবে।

### ছাত্র সংসদ নির্বাচন

অসৎ নেতৃত্বের অপসারণ ও সৎ নেতৃত্বের প্রতিষ্ঠা ছাড়া দুনিয়াতে ইসলামী সমাজ বিনির্মাণ সম্ভব নয়। তাই শিক্ষাপ্রতিষ্ঠানগুলোর চতুরেও আমাদের অনৈসলামিক নেতৃত্ব অপসারণের জন্য প্রাণপণ চেষ্টা করতে হবে। আমাদেরকে প্রত্যক্ষ বা পরোক্ষভাবে স্কুল, কলেজ, মাদ্রাসা ও বিশ্ববিদ্যালয় নির্বাচনে ভূমিকা নিতে হবে। কারণ, নির্বাচনে কোনো ভূমিকা না থাকা মানেই সংগঠনের অস্তিত্ব সম্পর্কে সন্দেহ জাগানো।

নেতৃত্বের ব্যাপারে আমাদের কোনো বক্তব্য না থাকার অর্থ শিক্ষাপ্রতিষ্ঠানে আমাদের কোনো প্রভাব না থাকা। সন্ন্যাসী বা বৈরাগীর মতো সাধারণত আমরা ভোটদান থেকে বিরত থাকতে পারি না। আমাদেরকে ভোট দিতে হবে। কিন্তু কাকে ভোট দেবো? যেহেতু আমরাও আন্দোলন করছি তাই হয় নিজেদের কর্মী প্রার্থী করাতে হবে নতুবা অপেক্ষাকৃত ভালো ব্যক্তিকে সমর্থন করতে হবে।

### ছাত্র সংসদ নির্বাচনে আমাদের নীতি

- ক. আমরা শিক্ষাপ্রতিষ্ঠানে নিজেদের মূল কাজের পরিমাণ যাচাই করে নির্বাচনে অংশগ্রহণ করার সিদ্ধান্ত গ্রহণ করি। অর্থাৎ কর্মীসংখ্যা, সমর্থক সংখ্যা, বায়তুলমালের আয়, বই বিতরণের মাসিক পরিমাণ ও পাঠকসংখ্যা ইত্যাদি বিবেচনা করে আমাদেরকে নির্বাচনে প্রতিদ্বন্দ্বিতা করার সিদ্ধান্ত নিতে হবে।
- খ. শুধু নির্বাচনে অংশগ্রহণ আমাদের কাজ নয়। নির্বাচনের আগেও আমাদেরকে মৌলিক বা বুনিয়াদি কাজ করতে হবে।
- গ. নির্বাচনে অংশগ্রহণ করার সিদ্ধান্ত নেওয়ার পূর্বে কেন্দ্রীয় সভাপতির অনুমতি নিতে হবে।
- ঘ. সভাপতি বা দায়িত্বশীল কর্মীগণ কেন্দ্রীয় সভাপতির অনুমতি ছাড়া নির্বাচনে প্রতিদ্বন্দ্বিতা করতে পারবেন না। মনে রাখতে হবে মূল কাজের ক্ষতি সাধন করে নির্বাচনে অযথা জড়িয়ে পড়ার পরিণতি মারাত্মক।

## পঞ্চম দফা কর্মসূচি : ইসলামী সমাজ বিনির্মাণ

‘অর্থনৈতিক শোষণ, রাজনৈতিক নিপীড়ন এবং সাংস্কৃতিক গোলামি হতে মানবতার মুক্তির জন্য ইসলামী সমাজ বিনির্মাণে সর্বাঙ্গিক প্রচেষ্টা চালানো।’

এখানে অবশ্য মনে রাখতে হবে আমরা ছাত্র। ছাত্রসমাজ নিয়েই আমাদের আন্দোলন। তাই ছাত্রত্বকে বিসর্জন দিয়ে আমরা কোনো তৎপরতা চালাতে প্রস্তুত নই। একটি দায়িত্বশীল ছাত্রপ্রতিষ্ঠান হিসেবে সমসাময়িক রাজনৈতিক তৎপরতার সাথে আমাদের তৎপরতাকে একাকার করে দিতে পারি না। তাই বলে জাতীয় সংকটের মুহূর্তে প্রয়োজনীয় পদক্ষেপ গ্রহণ করা থেকে আমরা বিরতও থাকতে পারি না। এর অর্থ এই নয় যে, সাধারণ অবস্থায় আমরা জাতীয় সমস্যা থেকে দূরে থাকি। আত্মসচেনতার সাথে আমরা জাতীয় সমস্যা অবলোকন করি এবং তা দূর করতে বলিষ্ঠ ও গণমুখী ভূমিকা পালন করি। সামগ্রিকভাবে অর্থনৈতিক, রাজনৈতিক এবং সাংস্কৃতিক ক্ষেত্রে ইসলামী পরিবেশ তৈরি করার জন্য সংগঠনের পক্ষ থেকে প্রচেষ্টা অব্যাহত থাকে। এ ব্যাপারে সংগঠনের সর্বোচ্চ নীতিনির্ধারণী কমিটি কার্যকরী পরিষদের সিদ্ধান্তক্রমে বাস্তব এবং কার্যকর পদক্ষেপ গ্রহণ করা হয়ে থাকে। দু’ভাবে আমরা এ দফার কাজ করে থাকি।

**প্রথমত :** ইসলামী সমাজ বিনির্মাণ মুখের কথায় বা শ্লোগানের মাধ্যমে সম্ভব নয়, এর জন্য প্রয়োজন যোগ্য নেতৃত্ব ও কর্মীবাহিনী গঠন।

**ক. ক্যারিয়ার গঠন :** আমাদের প্রত্যেককে Career গঠনের ব্যাপারে সবিশেষ গুরুত্ব দিতে হবে। কোনো অবস্থাতেই ক্যারিয়ারকে ক্ষতিগ্রস্ত করা যাবে না। আসলে আমাদের সংগঠনে যে সমস্ত কাজ রয়েছে তা সম্পন্ন করতে গিয়ে ক্যারিয়ার ক্ষতিগ্রস্ত করার প্রয়োজন হয় না। শুধু প্রয়োজন বাস্তব অনুভূতি, ত্যাগ-তিতিক্ষা ও অক্লান্ত পরিশ্রম। এক্ষেত্রে কোনো ব্যতিক্রম হলে তা বিশেষ পরিস্থিতিতেই হয়। বস্তুত ক্যারিয়ারকে অক্ষুন্ন রেখে যে সংগঠনের কার্যাদি সুষ্ঠুভাবে সম্পন্ন করতে সক্ষম সেই ভালো কর্মী। এ ধরনের কর্মীই আমাদের কাম্য।

**খ. নেতৃত্ব তৈরি :** সঠিক নেতৃত্বের অভাবেই জাতি বিভিন্ন সময়ে বিভিন্ন দুর্যোগের সম্মুখীন হয়। ইসলামী সমাজ বিনির্মাণ সাধন তো দূরের কথা জাতির সাধারণ কোনো কাজও সঠিক নেতৃত্বে ব্যতিরেকে সুসম্পন্ন করা সম্ভব নয়। এজন্য নেতৃত্বের গুণাবলিসম্পন্ন কর্মীদের সংগঠনের যাবতীয় তৎপরতা ও উপযুক্ত প্রশিক্ষণের মাধ্যমে গড়ে তুলতে হবে। রাষ্ট্র পরিচালনার যাবতীয় ক্ষেত্রে

যেমন- প্রশাসন, প্রকৌশল, শিক্ষা, কৃষি, শিল্প, পার্লামেন্ট ইত্যাদির প্রতিটি ক্ষেত্রে যথার্থ পরিচালক প্রয়োজন। দীর্ঘমেয়াদি ও বাস্তবমুখী পরিকল্পনার মাধ্যমে আপনাদের এ প্রয়োজন পূরণ করতে হবে। তাই কর্মী নিজে অথবা সংগঠনের পরামর্শে যেকোনো একটি বিভাগকে টার্গেট করে নেবে। তারপর উক্ত বিভাগের একজন এক্সপার্ট হিসেবে গড়ে ওঠার প্রচেষ্টা চালিয়ে যাবে। মোটকথা, আমরা সত্যিকার মুসলিম চিকিৎসক, মুসলিম প্রশাসক ইত্যাদি তৈরি করতে চাই।

গ. কর্মীগঠন : ইসলামী রাষ্ট্র পরিচালনা ও ইসলামী সমাজ বিনির্মাণ সাধনের জন্য একদল সুশৃঙ্খল কর্মীবাহিনীর প্রয়োজন। এ সংগঠন তার যাবতীয় তৎপরতার মাধ্যমে উপরোক্ত প্রয়োজন পূরণ করতে চায়। অতএব সংগঠনের যাবতীয় কার্যক্রম যথার্থভাবে মেনে চলাই এক্ষেত্রে আমাদের কাজ।

ঘ. জ্ঞান অর্জন : রাজনীতি, অর্থনীতি, শাসনতন্ত্র ইত্যাদি ক্ষেত্রে সক্রিয়ভাবে অংশগ্রহণ করার পরিবর্তে এতদসংক্রান্ত জ্ঞান অর্জন করাকেই আমরা প্রাধান্য দিয়ে থাকি। নিম্নোক্ত দিকগুলোকে সামনে রেখে আমাদের জ্ঞান অর্জন করতে হবে।

সর্বপ্রথম চরিত্র সম্পর্কে স্পষ্ট জ্ঞান আমাদের থাকতে হবে। জাতীয় চরিত্রের বর্তমান বিপর্যস্ত অবস্থার অন্তর্নিহিত কারণ আমাদের উদ্ঘাটন করতে হবে এবং সমাধানের সঠিক পথ জানতে হবে।

দেশের রাজনৈতিক পরিস্থিতি সম্পর্কে প্রয়োজনীয় ধারণা রাখতে হবে। ইতিহাস, ঘটনাপ্রবাহ ইত্যাদি বিশ্লেষণ করে বর্তমান রাজনৈতিক গতিধারার উৎস খুঁজে বের করতে হবে। রাজনৈতিক ক্ষেত্রে যে সমস্ত দল সক্রিয় রয়েছে তাদের পরিচয় ও বৈশিষ্ট্য জানতে হবে। বিভিন্ন রাজনৈতিক মতাদর্শসংক্রান্ত প্রয়োজনীয় মৌলিক জ্ঞান অর্জন করতে হবে। তাদের কোনটা কল্যাণকর এবং কোনটা ক্ষতিকর তা বুঝতে হবে। রাজনৈতিক সমস্যার সঠিক সমাধান কী, এ সমাধান কোন পথে আসতে পারে তার প্রয়োজনীয় জ্ঞান অর্জন করতে হবে। অর্থনৈতিক সমস্যার গতিধারার ও রূপরেখা জানাও আমাদের প্রয়োজন। বর্তমানে যে ধরনের অর্থনীতি চালু আছে তার মূলব্যবস্থাদিসংক্রান্ত জ্ঞান থাকা আবশ্যিক। এছাড়া বিভিন্ন অর্থনৈতিক সমস্যা সমাধানে সঠিক পথ ও পন্থা ইত্যাদি বিষয়ে স্পষ্ট জ্ঞান থাকা চাই।

সাংস্কৃতিক গোলামির ভয়াবহতা সম্পর্কে আমাদের বাস্তবমুখী জ্ঞান থাকা

প্রয়োজন। সাংস্কৃতিক ক্ষেত্রে কী কী ধ্বংসাত্মক তৎপরতা চালু আছে তার উৎস, রূপ ও ব্যাপকতা সম্পর্কে সম্যক ধারণা থাকা আবশ্যিক। কোথায় কোন পদ্ধতিতে কোন নীতিমালার ওপর ভিত্তি করে আঘাত হানলে সাংস্কৃতিক গোলামি থেকে আমরা মুক্তি পাব তা যথার্থ জ্ঞানের মাধ্যমে উপলব্ধি করতে হবে।

মোটকথা, বাতাসের ওপর ভিত্তি করে আমরা চলতে চাই না। ইসলামী সমাজ বিনির্মাণের নামে মরীচিকার পেছনে ছুটতে আমরা নারাজ। আমাদের আবেদন, আমাদের যাবতীয় তৎপরতা হবে যুক্তিনির্ভর ও বুদ্ধিভিত্তিক। ইসলামী মূল্যবোধের ভিত্তিতে চারিত্রিক প্রতিফলনই হবে আমাদের কাজের মূল হাতিয়ার।

দ্বিতীয়ত : বাস্তব পদক্ষেপ গ্রহণ। এক্ষেত্রে দু'ধরনের কাজ আমাদেরকে করতে হবে।

ক. সহযোগিতা : ইসলামী আন্দোলনের যেকোনো বৃহত্তর প্রচেষ্টাকে সহায়তা করা আমরা আমাদের নৈতিক দায়িত্ব বলে মনে করি। তবে তা আমরা করে থাকি সংগঠনের সিদ্ধান্তের ভিত্তিতে।

খ. পরিবেশ সৃষ্টি ও চাপ : চারিত্রিক মাধুর্য দিয়ে জাতীয় জীবনে একটা পবিত্র পরিবেশ সৃষ্টির তৎপরতা চালাতে হবে। এ তৎপরতা যখন উল্লেখযোগ্য সংখ্যক ছাত্রদের সংশ্লিষ্ট করতে পারবে তখন সমাজ ও জাতীয় জীবনে তা একটি শক্তিরূপে আত্মপ্রকাশ করবে। আর এহেন চারিত্রিক শক্তি দিয়ে আমরা কর্তৃপক্ষের ওপর চাপ সৃষ্টি করতে বদ্ধপরিকর।

এছাড়াও আমরা আমাদের ৫ম দফা কর্মসূচি বাস্তবায়নের জন্য সময়, সুযোগ ও সামর্থ্য অনুযায়ী জনগণের অঙ্গনে আল্লাহর বাণী পৌঁছে দিয়ে জনমত সংগ্রহ করতে চাই। সভা, মিছিল, ধর্মঘট ইত্যাদি প্রয়োজনের পরিপ্রেক্ষিতে এবং গঠনমূলক পন্থায় করে থাকি।

উপরোক্ত কাজগুলোই হলো আমাদের সংগঠনের পাঁচ দফা কর্মসূচি বাস্তবায়নের সঠিক পন্থা। যিনি আমাদের সংগঠনের মাধ্যমে ইসলামী আন্দোলনের দায়িত্ব পালন করতে চান তাঁকে এ কাজগুলো ক্রমান্বয়ে আঞ্জাম দিতে হবে।

## পরিশিষ্ট

### আলোচনার বিষয়

এখানে সভাসমূহে আলোচনার জন্য কিছু বিষয় উল্লেখ করা হলো। এছাড়া প্রয়োজন ও সময়োপযোগী বিষয় নিজেরা নির্ধারণ করে নিতে হবে।

- ইসলাম একটি পরিপূর্ণ জীবনবিধান।
- কালেমায়ে তাইয়েবার তাৎপর্য।
- ইবাদতের সঠিক অর্থ ও তাৎপর্য।
- ইসলামের মৌলিক পাঁচটি প্রত্যয় ও তার তাৎপর্য।
- ঈমানের বৈজ্ঞানিক ভিত্তি।
- তাওহিদ, রেসালাত ও আখিরাত।
- পরকাল, যুক্তি ও বাস্তবতার দাবি।
- আল-কুরআন কী ও কেন?
- মুসলমান কাকে বলে বা সত্যিকার মুসলমান কারা?
- মানবতার মুক্তির দিশারি ইসলাম/ইসলাম মানবতার একমাত্র মুক্তিপথ।
- ইসলাম একটি আন্তর্জাতিক মতবাদ।
- ইসলাম একটি ভারসাম্যপূর্ণ জীবনব্যবস্থা।
- ইসলামী জ্ঞান অর্জন ও অনুশীলনের প্রয়োজনীয়তা।
- একজন মুসলিম যুবকের কাছে ইসলামের দাবি।
- চরিত্র গঠনের প্রয়োজনীয় উপাদান।
- আদর্শ নাগরিক গঠনের প্রকৃত উপায়-ইসলাম/মানবীয় চরিত্র গঠনের একমাত্র উপায়-ইসলাম।
- যে শিক্ষা পাচ্ছি, আর যে শিক্ষা চাই।
- আধুনিক শিক্ষাব্যবস্থার গলদ ও তার প্রতিকার।
- সহ-শিক্ষার কুফল।
- ইসলামী শিক্ষাব্যবস্থার রূপরেখা।
- ইসলামের নৈতিক দৃষ্টিকোণ।
- ছাত্রশিবির কী চায়? কেন চায়? কীভাবে চায়?
- আমাদের লক্ষ্য ও উদ্দেশ্য।
- ছাত্রশিবির একটি গঠনমুখী ছাত্র আন্দোলন।
- ছাত্র সমস্যা সমাধানে ছাত্রশিবিরের ভূমিকা।
- আমাদের পাঁচ দফা (বৈজ্ঞানিক কর্মসূচি : ঈমানের দাবি)।
- দাওয়াত-মুমিন জীবনের মিশন।
- ইসলাম প্রচার ও প্রতিষ্ঠায় একজন মুসলিম যুবকের ভূমিকা।
- ইসলামী দাওয়াতি কাজের গুরুত্ব ও প্রয়োজনীয়তা।
- সৎকাজের আদেশ ও অসৎ কাজের নিষেধ- মুসলমানের দায়িত্ব।
- ইসলামী আন্দোলন কী এবং কেন?
- ইসলামী আন্দোলন ঈমানের অপরিহার্য দাবি।
- ইসলামী আন্দোলনের প্রয়োজনীয়তা।
- ইসলামী সংগঠনের প্রয়োজনীয়তা।
- ইসলামী আন্দোলনে যুবশক্তির ভূমিকা।
- উপমহাদেশে ইসলামী আন্দোলন- একটি ঐতিহাসিক পর্যালোচনা।
- বর্তমান বিশ্বে ইসলামী আন্দোলন : সাফল্যের সম্ভাবনা।



- বাংলাদেশে ইসলামী আন্দোলন ও ছাত্রশিবিরের আবির্ভাব।
- বাংলাদেশে ইসলাম প্রচারের ইতিহাস।
- বাংলাদেশের সমাজ কাঠামোতে ইসলাম : একটি পর্যালোচনা।
- আমাদের সমাজে কুসংস্কার ও বিদায়াতের অনুপ্রবেশ।
- মুসলিম জাতির উন্নতির প্রকৃত পথ।
- মুসলিম বিশ্বের মৌলিক সমস্যা ও তার সমাধান।
- মুসলিম জাতির দায়িত্ব ও কর্তব্য।
- মুসলিম বিশ্বের ঐক্যের মূল সূত্র ইসলাম।
- ইসলামী রাষ্ট্র বনাম মুসলিম রাষ্ট্র।
- ইসলামের দৃষ্টিতে রাষ্ট্র ও রাজনীতি।
- ইসলামী রাষ্ট্রই সত্যিকার কল্যাণ রাষ্ট্র।
- শোষণমুক্ত সমাজব্যবস্থা প্রতিষ্ঠা একমাত্র ইসলামেই সম্ভব।
- ইসলাম ও পুঁজিবাদ।
- ইসলাম ও সমাজতন্ত্র।
- ইসলাম ও সাম্প্রদায়িকতা।
- গণতান্ত্রিক মূল্যবোধ ও ইসলাম।
- ইসলাম ও প্রগতি।
- ইসলাম ও প্রতিক্রিয়াশীলতা।
- ইসলাম ও জাহেলিয়াতের দ্বন্দ্ব।
- ধর্মনিরপেক্ষ মতবাদ।
- তাওহিদ ও বস্তুবাদের দ্বন্দ্ব।
- মানবতার মৌলিক সমস্যা কী?
- মানবতার মূল সমস্যা কি অর্থনৈতিক?
- বস্তুবাদ নাস্তিকতারই অপর নাম।
- বিজ্ঞান নাস্তিকতা ও বস্তুবাদকে অবৈজ্ঞানিক প্রমাণিত করেছে।
- শ্রেণি সংগ্রাম- সত্য ও মিথ্যার দ্বন্দ্বই পৃথিবীর ইতিহাস।
- সর্বহারার একনায়কত্ব নয়- খোদায়ি প্রভুত্বই মুক্তির একমাত্র পথ।
- মানুষের ওপর মানুষের প্রভুত্বই, সব জুলুমের মূল কারণ।
- মার্কসীয় সাম্যবাদ- আবাস্তব কল্পনা।
- ধর্ম ও রাষ্ট্রের দ্বন্দ্ব বিকৃত খ্রিষ্টবাদের পরিণতি।
- ধর্ম আফিমস্বরূপ- একটি প্রতিক্রিয়াশীল ধারণা।
- শ্রেণি হিংসা নয় মানবীয় মূল্যবোধ উজ্জীবনই কল্যাণের প্রকৃত পথ।
- মার্কসীয় অর্থনীতি একটি অবৈজ্ঞানিক তত্ত্ব।
- পুঁজিবাদ ও সমাজতন্ত্র দুটি প্রতিক্রিয়াশীল প্রান্তিক ধর্মীয় মতবাদ।
- মার্কসবাদ ও বাস্তবতার সংঘাত।
- ইসলাম ও বিজ্ঞান একটি পর্যালোচনা।
- যুগ-জিজ্ঞাসার দাবি- ইসলাম।
- ইসলামী আকিদা।
- আমাদের ব্যবহারিক জীবন।
- বর্তমান পৃথিবীর সবচেয়ে বড়ো সমস্যা স্রষ্টাকে ভুলে যাওয়া।
- আসহাবে রাসূলের জীবন কথা।
- ভারসাম্যপূর্ণ জীবনগঠনে সময় ব্যবস্থাপনা।
- বর্তমান বিশ্বে ইসলামী সমাজ বিনির্মাণ : সমস্যা ও সম্ভাবনা।
- ধীন জ্ঞান, ক্যারিয়ার গঠন ও দক্ষতা অর্জন।
- আসহাবে রাসূলের জীবনে ত্যাগ ও কুরবানি।

